

寓

蜀

草

寓蜀草卷二

七言古

濟南王培荀雪嶠

秋燈課子圖

爲歷城劉明府太夫人作

空庭月黑萬籟沈一燈熒熒霜氣侵白髮阿母血淚墮
手撫貌孤感寸心遺書千卷親口授寒風四壁助陰森
機聲未歇讀未止飲冰與兒同生死勉取青紫慰重泉
忍擲韶華付逝水苦志格天天亦憐喜看皇路著先鞭
伏案猶疑膝下讀鐙花欲落思黯然畫工繪圖難繪意
一卷丹青千載淚無父有書堪成名有祿無母難養志
惟奉慈訓矢冰霜三齊共傳清白吏

贈吳雲陔

安徽人

方寸隆隆五嶽起倒挽銀河瀉秋水邇來豪氣一夕平
肝膽未敢向人傾眾裏見君忽眼明皎如玉樹神骨清
一官潦倒不稱意昂藏羞下窮途淚時吐奇句追古人
天魔獻舞天花墜閒來握手胡盧笑萬事浮雲未可料
蟲臂鼠肝任付予掉頭那顧旁人謂我有狂詞向君陳
如君豈是淪落人莫耶鋒利發矂新慎莫輕試出風塵
藏匣有日呈 至尊斬蛟刺兕超等倫

讀南史

家徒四壁空簞瓢一擲百萬氣何豪當時若殺劉寄奴

再造晉室勳業高莫倚成敗論英雄太阿缺折非鉛刀
後來沈謝皆英傑駕名叛逆罪莫逃青史幾卷泣忠魂
徒令寒士心忉忉

登州觀海市歌

聽馬子
琴談

飛來百丈濤頭落雪浪如山打城腳天光壓海海色青
撐破虛空建飛閣振衣直上倚危欄極目無邊眼界拓
是時雨過天無風非烟非霧兼青紅萬怪惶惑爭出沒
時如車馬時如童白衣飄搖掛天末化爲蒼狗毛蒙茸
忽疑神山隨波湧金銀宮闕有無中蛟室亂灑珠萬斛
玉池開放千花叢又疑徐福求仙返樓船凌虛近忽遠

馮夷擊鼓鼉架梁天吳橫飛形偃蹇須臾風捲淨無煙
海圓如鏡磨青天萬象幻滅盡如此不獨滄海爲桑田
我聞客談空神往恨不躡迹追飛仙琪花瑤草紛在眼
朝夕嘯傲駐遐年安得神風吹相送頃刻直到蓬萊顛

憎蚊

晝隱夜行聲相呼輕身利嘴繁有徒吸風飲露亦足娛
吹毛飲血胡爲乎美人輕羅白玉膚碧紗帳軟懸流蘇
側身潛入形有無背癢難搔倩麻姑亦有北窗臥文儒
擾亂清夢阻華胥火攻下策亦良迂炎蒸助虐似烘爐
猛虎可射鯨可屠么麼微物困勇夫皮膚僅存髓欲枯

供汝饕餮樂斯須豈能負山移海嶠飛而食肉擇膏腴
飽則颺去通天誅伺隙而動伏牆隅偶中毒手血沾濡
死者穰穰猶爭趨一飽營營僅錙銖先聲驚人乃遭屠
口腹爲害竟忘軀蚊乎蚊乎爾何愚

大挑戲作

鄉舉里選弊久滋後代求士貴文詞暗中摸索或失之
以貌取人辨威儀年少潔白美丰姿眾中佼佼自稱奇
有如嬌娥臨嫁時整理釵釧工畫眉堪憐老醜似東施
暗補缺牙染白髭剃面傅粉靡不爲寒士亦復難相皮
雁行序立滿階墀徐徐引入伏如蛇自述名姓語無歧

頃刻列名判等差英雄末路悲數奇日暮窮途悔何追
朝廷憐才恐有遺慎持冰鑑付所司人處囊中忽露錐
疏通壅滯公無私亦有矢志長嗟咨追憾明鏡昧妍媸
天意杳冥人莫知不肯採擷培蘭芝後來紛紛名遠馳
較量得失莫恨遲

望太華

灝氣蒼茫空中積壓人嵐翠濃欲滴疑是海上三神山
從天飛來驚遠客細認西土青蓮花平地湧出數千尺
開鑿當日勞鬼神削成四方實創格奇人探勝不憚險
攀鎖踏磴如緣壁明星玉女插天半四望關河皆歷歷

作詩作記兼作畫傳布人間有幾冊我來遙望不得登
昂首層霄但一碧醞釀黛色滿關中爽氣作雲飛無迹
中條雄偉如主賓黃河回繞挾霹靂參差似露仙人掌
巨靈伸臂星可摘我友呂君名子文同邑人嘗至巔咳唾九天
驚人魄爲言賈勇有神助手援白日雲扶腋我欲掘取
十丈蓮乘藕作船隨所適不敢題詩落雁峰且復裂月
一吹笛如何束縛在塵土掉臂錯過殊可惜車馬匆匆
困道途何時凌霄生羽翮

過驪山

驪山烽火久已絕驪山溫泉水猶熱千載紅顏稱溫柔

啼笑能教山河裂秋山蒼翠尙依然想見蛾眉秀可擷
泉水清瑩如明鏡曾浴香肌融冰雪幽王沈溺原昏庸
可怪明皇乃英傑前車久覆後車來賢愚一邱誰能別
一火赤燒宮闕灰一水橫流四海血

長安道中

回首山東已多日車過崤函險始出平原一望土壤肥
禾黍如雲樹青鬱久識關中氣象豪諸侯劒佩擁弓刀
長虹飲澗橋梁壯美妓當壚螺髻高古來名勝凡幾處
轉眼興亡如朝暮通天臺廢白雲封茂陵草荒流螢度
我懷壯志自昔年慷慨欲歷古山川作賦愧無相如筆

爭名已讓祖生鞭不恨蹉跎成白首且喜覽奇西南走
帝王將相幾陳人佐我濁醪傾一斗

五丈原

陰雲慘慘天欲暮七尺穹碑道旁樹三字大書五丈原
此是武侯屯師處漢家王業不偏安厲志中原伐狐兔
祁山兵出如雷霆曹丕氣奪仲達懼鞠躬盡瘁老臣心
食少事繁豈能顧將星一落三軍驚鬼神暗惜不能護
古來成敗有誰知不怨天心怨氣數盜竊神器歸巨奸
司馬家兒爲曹助公雖一死壯千秋忠義感激泣行路
後來宗澤亦人豪黃河滔滔屢呼渡長使英雄淚沾巾

我亦三復杜陵句

太公垂釣處

南山陡削勢岌岌
汧渭合流波浪急
宇內鼎沸民怨嗟
手執漁竿誰獨立
亂髮飄蕭垂過耳
空巖無人愁風雨
緬想英概氣尙遒
孰知胸中富奇謀
少壯不用今白頭
世人大笑羞與儔
一旦功建身封侯
雄風遠播海東流
吁嗟乎淮陰垂釣
扶炎劉嚴陵垂釣
高千秋奇士不爲
帝王求滅沒草澤
同蜉蝣

棧道行

一峯危坐一峯眠
一峯孤峭一峯圓
一峯傑立出雲表

一峯奔騰赴水邊亂峯合脊不知數有如萬笏朝青天
中有蛇盤一線之仄徑穿林渡澗勢蜿蜒溪緣路轉隨
曲折噴珠翻雪聲喧闐更有飛瀑時截道墜溪澎湃石
爲穿北人初至心膽怯乘馬不敢輕搖鞭况復陰晦天
色暗白雲已羃層山巔入後登陟更險絕路狹山陡怪
石懸古人設關扼衝要一夫能阻萬軍前幸生太平息
烽火客行千里得安便左右顧盼娛耳目野花垂岫色
清妍霧雨空濛征衣潤爽翠撲人雜青烟若割數里歸
鄉土一邱一壑吾能專捧檄遠來得縱目當與山水有
前緣

山行

一線緣崖徑曲迴肩輿直上高崔嵬下顧長溪隨路去
但聞聲響奔怒雷溪水浸山土成穴暴雨摧山石爲裂
棧道中斷足難移行人相顧面無色炎天何事促行裝
阻雨三日意傍徨今日喜晴似火迫蹈險不復戒垂堂
株守鄉園復何有丈夫東西南北走偃息不肯履危途
他日投艱但袖手

紫柏山嶽奇秀拔中多靈異張良辟穀於此

遙望白雲緩隨風參差碧岫凌虛空七十二洞未親歷
但聞藥苗鬱青蔥畱侯曠世覩鸞鳳萬里雲霄終一縱

功成辟穀應悔遲報漢扶劉等幻夢人間功徇已遭烹
水底驪龍誰敢攫丹成白日忽飛去迴頭低視漢公卿

定軍山

定軍山前結陣雲松栢肅肅鴉不聞行人下馬每再拜
惟將涕泣慰孤墳周行畫廊苔蘚侵尙遺石牀臥素琴
此調不彈幾千載無絃有曲感人心宮商和諧堂陛樂
一時魚水真知音軫絕絃摧山河裂沔水嗚咽環清林
鳳翔太虛竝影滅風過叢薄學龍吟先主有靈淚暗吞
風車下降雲旗翻一彈再鼓誰復見羣山慘淡林木昏
枯栢渡有感

如馬如牛聳巨石風吹濁浪似箭急江山今復似當年
轉憶循良挽舟日達官僕從盛如雲豔賞春光日未曛
追捕閭閻供游樂耕作那復恤辛勤于公慈愛壯心激
手緯百丈無難色刺史驚悔亦人豪頃刻罷遊真盛德
舊書不載未旁搜孫樵一傳炳千秋自古政績多湮沒
不得奇文難久留

朝天峽

峭壁千尋冪白霧江流漱石波吼怒石穴密布如蜂窩
當年支板走如鷺昔穴石支木爲棧道天設雄關扼蜀門舊有朝天關
盛世清晏少兵戍則天生處知匪遙鸚鵡一鳴唐社仆

明皇定亂本英雄可憐亦走利州路
禍水漲天來玉環覆轍相尋古今
怖漫將興衰感陳迹一葉小舟順
流渡遙聞玉洞飛仙人白龍洞閣西有山崛起翠壁萬仞中
闢大門可五六丈時有仙人出現
飄飄霞舉令人慕嘉陵江水碧無
情紅日銜山月初吐

樊橋

相傳蕭何追韓信於此
橋爲樊噲所建故名

相君走漢主驚國士亡誰面爭在
楚典連敖在漢等老兵莫邪韜光
覲面失分埋塵土終此生孰謂當
時刀筆吏一朝力薦萬人英范增
老矣好奇計不識奇士真不平楚
漢存亡不兩立端在相君暗與明

入蜀感懷

少年意氣多豪縱，劣如驕驄不受控。讀書妄意致勳名，
人誇頭角頗殊眾。捫腹渴欲吸西江，仰空夢或吐白鳳。
猖狂不顧驚鬼神，崛強那復恤飢凍。百事無成髻已霜，
如水年華迢迢送。今歲捧檄來西川，風塵萬里勞引鞚。
南渡黃河觀洛陽，西瞻太華壯岐雍。驅車峭函入長安，
今古豪華真一夢。棧道紆迴籠蜀雲，五丁開闢裂一縫。
千轉萬迴峯不窮，馬蹄流血僕夫痛。怪石磊落虎豹蹲，
哀壑奔騰蛟龍鬭。素耽山水神已疲，造物困人爲奇弄。
疑蓄魑魅潛深林，或有仙人居巖洞。肩輿危坐意無聊，
手執一編時吟諷。朝餐古驛濁醪酸，暮宿荒村寒霧重。

風雨驟來溼衣裳潦水截途囊屨空路過漢中厰平原
心胸開豁烟雲供艱難厯盡到錦城萬家鱗次連綺棟
聊租一廛等齊民需次微官無薄俸良朋幸不我棄捐
朝夕杯酒相與共仕途曲折夙未諳往日詩書成何用
况復性質本迂疎善事上官心懷恐閭閻刀劒期共藏
滿縣桃李庶能種

有感

富貴端須致身早當道貴游皆傾倒輕車肥馬意氣粗
宮室花木疑蓬島廣開綺筵羅眾賓地鋪錦毯爇龍腦
南國歌兒貌如花管絃雜奏聲繚繞儀態萬方媚主人

含情流盼身輕裊吳綾蜀錦催製衣鮮服愈覺容色佻
但歌一曲祝千春一曲千金猶嫌少坐中亦復有老儒
槁項敝衣詞囁嚅數十白金較錙銖終歲辛苦爲傭書

擬寄周治章

滄溟一瞬水清淺萬事如雲隨風卷少年那知惜流光
事後追思腸迴轉憶予總角亦趨庭與君一堂同執經
瑤環瑜珥人爭羨雨小嬉戲稱忘形四十餘年忽如夢
廉吏子孫已屢空適來錦城詢故知耆舊凋零堪一慟
我艱一第鬢已蒼需次旅邸秋風涼君家書籍盡銷散
先人手澤今半亡松崖先生君真偉度階前亭亭三玉

樹君父兄弟三人家君相愛如弟昆官舍談讌無朝暮
荒墜先業予心憂詢君家計孰綢繆富貴已付浮雲外
讀書萬卷志難酬人事反覆無窮已長繩繫日那能止
古人不朽垂千秋區區盛衰休掛齒

雨中遊草堂

昨遊草堂看翠竹天日清明豁遠目今日遲客復來遊
風雨蕭蕭響眾木百尺琅玕更便娟亭亭綠玉參青天
疑是二妃淚痕溼幾枝低亞湘江邊畫手難得文與可
潑墨淋漓滿雲烟願與此君常相守蒼翠濃陰覆左右
堂前偃蹇數株梅共結歲寒伴清瘦一溪警環自西來

三間瓦屋妙結構後人增飾置亭臺少陵茅簷已非舊
新雨深怕溼旒旌還屬舊雨杯同傾泥應沒蹀日西沈
相呼輿馬急入城

同年共請學使
王寶珊因雨不至

遊武侯祠

江流洶湧抱南郭崢嶸古寺風蕭索拜瞻遺像仰清高
千載英靈猶如昨當年馳驅戎馬勞六尺之孤信可託
西連惠陵翠竹環君臣契合冥漠閒山鬼潛逃百神會
風雨憑凌舊河山愛子忠魂猶侍側綿竹血戰心惻惻
氛消芳甸江峯青月落楓林瘴烟黑與公正氣干青冥
古柏猶帶風霜色筵陳俎豆畫簷新父老欲語聲還塞

男兒得志當太平幾箇銘心許報國封疆安靜車書同
身既泰然名亦得憶自雒城驅馬來憑弔鳳雛墓崔嵬
豪傑齊名堪竝駕南北相望氣雄哉

題沙澗泉登岱圖

既不能如列子御長風舉眼遙望東海東又不能如仙
人騎黃鶴飄然兩翼凌虛空便當獨立縹緲之峯頂一
覽空闊盡寰中客生江南遊東魯直上天門摩蒼穹羣
山聚米羅足底浩浩元氣接鴻濛前有秦皇後漢武雄
心霸氣如龍虎茫茫舊迹不可尋惟看題詩有杜甫歸
鳥翼翩翩盪胸雲吞吐俯看眞覺地可盡舉手始信天

可補豈獨眼界到吳門開拓心胸羅萬古恨余自幼居
岱陰未曾攜杖快登臨曾聞半夜觀海日輪闊三丈鎔
黃金問君此圖誰點染千巖萬壑縮半卷萬里家山未
能到空來蜀地閱奇險今君袖中有泰山興來臥遊時
一展我亦欲向圖中遊極目齊州烟九點

黃嶠樵以清溪九曲琴舫圖冊索題

未能騎鶴化飛仙揚州名勝畫中傳楓葉紅飄千樹雨
柳絲晴漾一溪烟烟雨迷離消今古笙簫處處酣歌舞
臨流亭榭影參差罨畫溪山誰作主領略風光有勝流
沿溪一葉駕扁舟橫琴危坐孤篷底綠酒黃花置兩頭

二分明月猶如昨萬籟初沈境寂寞愛彈謾謾風入松
擇向林泉幽處泊桃葉桃根古渡橫至今人羨綠楊城
紅袖空思園杜牧書樓何處問昭明羅衣豔豔橋邊影
暮雨蕭蕭笛裏聲世外賞心饒清福清溪一轉彈一曲
依稀帆轉隨湘波山水清音共往復罨畫溪山絕可憐
如何拋卻向西川西川江水如油碧書畫一船百丈牽
隨人宛轉秦淮月入耳淒清蜀國絃憑弔馬卿舊遊處
抱琴敢望知音遇貰酒且脫驢驢裘薦人誰傳上林賦
回首江南無限情江天渺渺接烟樹

遊平都山

昔望太華巨靈掌身未登臨但懸想一帆直下來南賓
簿書紛紜落塵埃排空突兀翠壓城平都仙山千丈強
暇日賓從同遨遊籃輿未到已神往是時炎暑苦鬱蒸
汗流浹背首頻仰石磴盤折徑紆迴綠陰夾道風清爽
入門碑碣排如林凌虛樓閣勢宏敞縹緲飛雲掛檐楹
大江雪濤來天上烟嵐濃淡羅羣峰四望軒豁呈萬象
似生羽翼登蓬瀛天籟虛徐心曠朗陰王仙去誰能追
丹井幽深匿魍魎共詫陰府朝百靈又傳御史纏毒蟒
一笑憑欄默無言欲共坡仙披鶴氅昔東坡人閒勝境
遊此
難屢逢向平能穿屐幾緉欲下未下日平西徘徊卻立

神惆恍壁閒有詩未敢和
石刻吾鄉阮亭先生及前令李君更生詩歸來怵
怵每技癢忽然興到筆淋漓落紙如聞眾山響生平此
遊已絕奇肯讓太華稱雄長

寄別余孝廉禹門

自顧百事不如人偶然承乏來南賓案牘頗稀訟亦簡
欣逢佳士如飲醇君家兄弟敦孝友瀟灑襟懷得未有
良宵每共談風月名山相與攜美酒五日京兆惜匆匆
歸舟輕借一帆風金樽餞別不能飲碧雲倏吞落照紅
前行已抵渝州路盡是離人繫情處磊磊落落江邊石
鬱鬱蒼蒼山上樹回頭不見平都峰縹緲樓閣迷烟霧

中夜秉燭意倂倂開篋細讀贈別章魚龍驚起舞泯泯
星斗斜垂吐寒光大江東去流湯湯淘盡英雄幾斷腸
李白仙去東坡亡安得與汝豪士倒玉觴嗚呼安得與
汝豪士倒玉觴

淘金行

江邊多以
此爲業

洪鑪鑄財作名臣郭家金穴勢絕倫世人皆慕黃金貴
誰識淘金最苦辛朝在沙灘暮在水濱衣不掩肝頭不
冠巾水落天寒風淒緊赤腳踏石肉盡皴竹篩篩沙沙
成嶺點金不見愁眉顰家口嗷嗷人待哺望眼欲穿祈
鬼神嗟嗟爾不敢白晝攫市上又不能昏夜乞貴人業

此賤役勞且苦安貧食力眞良民豪家一釵值百萬縷
金作裙照眼新造物豈不仁夙生諒有因安得東海盡
揚塵沙礫變金鋪地勻四民歡樂無吟呻共祝吾
皇千萬春

緯夫嘆

蜀道之難路阻修崖危石險倦卽休獨憐緯夫溯江上
百丈緯挽令人愁渺渺無窮千疊浪峩峩如山萬斛舟
日行不滿六十里進寸退尺多淹畱登岸犖确踐亂石
雁行徐進聲呶嘍天寒無衣露兩肘有時跋涉踏淺流
未明卽起暮不止日覓百錢敢多求世閒苦人本無限

壯不食力眾所羞可惜無田得果腹八口待哺誰爲謀
蜀地多山少沃土奸民帶劒恣遨遊恃此一江通百貨
貧民取食借前籌一身雖勞心自泰不蹈法網免愆尤
仁者破例優犒賞斗酒呼羣醉江樓

趙忠毅公鐵如意歌爲何壽泉賦

千秋鐵漢思報主夜半慷慨獨起舞手持寸柄維乾綱
元兇奪魄舌驚吐熹宗大政歸奄人九千歲橫非人臣
高皇鐵牌从撤去太阿倒持誰敢噴智炳幾先奇男子
堅冰已占履霜始鐵鑄如意志擊奸紀時改元爲天啓
銀鏤古篆盤蛟螭繡澀斑文雜青紫元黃血戰閭滄桑

摩挲想見鐵心腸五彪五虎等螻蟻肝腦未碎精已亡
有日持以獻天子如斬馬劍存上方又或持以贈直士
如擊賊笏挾風霜吁嗟乎宦寺職在掃除列假以天威
炙手熱一擊不中謫遐方勁骨百鍊何能折金甌已壞
銅駝埋鬼神呵護錚錚鏤突兀五嶽起方寸義憤時擊
唾壺缺二十六字銘如新忠心耿耿光不滅

寶刀行贈車錫侯卽以送行

天下神物歸英傑尋在屠沽應不屑寶刀百鍊蘊精光
未遇朗鑑誰識別塵埋市廛人不售錫侯一見嘆奇絕
錫侯東海豪宕人賦性清剛慕忠烈暫向小邑試牛刀

卷之二
三
姦宄遁藏畏剔抉名登薦牘達九重重器當共球圖列
燕市歸來洗風塵錦城小住談風月喜獲利器志軒昂
拂拭鋒芒飛霜雪夜深月黑掛牀頭拔鞘一揮電光掣
不知經歷幾戰場芒刃猶帶古時血迂儒咋舌懦夫驚
冷氣射人灑毛髮錫侯錫侯且從容臨歧把袂爲君說
呂虔解贈吾未能輪囷肝膽一腔熱君如有夢夢益州
行試盤根與錯節利刃豈惟防一身雖宰天下如斯決
任重全憑鐵脊漢誰言過剛勢必折自愧鉛刀一割難
壯懷願藉君發泄寶刀寶刀得所歸慎藏篋中莫輕褻

讀蜀碧懷楊展

我讀蜀碧堪裂眚屠戮兩川獻賊至骸骸高於我眉山
腥氣薰天血滿地嘉定楊展奮鷹揚屢敗流寇多殺傷
天降飢饉民溝壑告糴屯田招流亡義旗一舉多響應
居然半壁保殘疆獻賊懷怒思一逞百萬東下勢威猛
將軍身爲士卒先飛鏃到處鐵甲穿羣寇崩潰反江口
兩岸夾擊船生烟風伯助順狂如虎雷霆格鬥播戰鼓
弩矢百道如飛蝗銃砲電掣火光吐江狹岸逼不能迴
屍擁亂流飢蛟舞獸奔魚爛不相救須臾骨肉成灰土
可憐搜括遍蜀都黃金白璧沈水府吁嗟乎流寇所向
無遺民覆軍殺將泣鬼神誰能力戰兇鋒挫萬姓含冤

何由伸快哉一炬如赤壁至今江畔飛青燐功成何必
蒙上賞英烈萬古垂天壤當年京都跨惡馬八尺雄姿
猶堪想

秦良玉

國門晝閉無大吠禁軍虛弱幾崩潰世亂國危見奇才
誰知英雄起粉黛桃花馬上雁翎刀萬里勤王不辭勞
天子召見賜顏色殿前武士失雄驍部下銳卒出蠻洞
按劒仰視青天高是時兩川多兵革張李流寇紛如織
劒問險峻戍樓空夜郎蒼茫陣雲黑撫軍文弱不知兵
督師縱賊意叵測石柱一旅當夔門東馳西擊苦筋奔

弟姪陣亡夫壻死艱難百戰孤身存志吞狂寇雙目勞
手提健兒向空舞四海鼎沸失金湯獨與皇家守寸土
血染紅裙溼錦袍賊望胭脂畏如虎海水羣飛失蛟龍
荆棘銅駝泣西風御賜篇章藏篋底淚滴錦江秋波紅
左帥男子名良玉向闕竟轡射日弓娘子軍帥名亦同
獨保勦名有始終

天寒

時家口未至旅館清
寂乃作小詩自遣

陰雲不動日光黑蒼茫四顧天地窄旅館蕭條但閉門
被裘孤坐霜氣逼簷雀噤聲鳥不飛江漢無波山傾側
欲訪梅花行路難端居無聊弄書冊錦城繁庶百萬家

金猊繡幕爭奢華可憐道路有窮丐赤體無衣誰歎嗟
忽憶合家在舴艋廣川多風正淒冷屈指猶須十日程
鴻飛不到但引領何似少陵草堂深妻孥團聚發高吟

薛濤井

一曲江流濯錦紅萬樹芙蓉裊香風美人化作彩雲影
雲飛縹緲畱空井節帥當年酷愛才華堂歌舞綺筵開
特地眼明賞頃國迴眸一笑花無色雅調翩翩更軼羣
傳來佳句妙香薰縹緲佳句流傳徧絕世丰神誰得見
綠竹蕭疎空掩門江干渾似苧蘿村石欄雕刻花紋古
碧甃苔侵鄰廢圃清波如鏡曉光新曾照蛾眉翠黛顰

胭脂洗盡餘殘水染出花箋豔莫比銅瓶一墜悔難收
污泥埋沒歷千秋雲鬢玉顏杳烟霧香銷蘭麝歸何處
蝴蝶飛來疑舊魂枇杷花落月黃昏年年抬翠腸空斷
杜鵑聲裏春光換錦江花發似昔時管領春風屬阿誰
從軍行送王虎持解餉馬邊

丈夫報國氣激烈無路請纓志空結邊夷小醜忽陸梁

蠻觸紛爭肆狡譎

黑夷三和勾涼山生番與熟僱仇殺

連村灰燼火燎原

婦孺啼號腥沸血

燒燬民房槍掠財物

元戎赫怒出偏師幕府羣

僚簡俊傑翩翩封胡正壯年聚米量沙才超越短衣結

束事鞍馬千里饋糧期無缺篋藏兵書氣吐虹腰佩長

劍光欺雪亂山深
箐嘯聚多禾突鼠竄費剔抉
三軍介馬待朝食
一鼓奮勇可速滅
君雖文弱不勝衣
同仇義憤齒共切
拋棄毛錐贊籌畫
隨眾唯諾應不屑
憶昔凱旋纔幾時
今茲蠢動蹈前轍
蜂蠆有毒須密防
困獸猶鬥戒泄泄
愧我才鈍似鉛刀
袖手坐視空奮舌
君甫捧檄已飲冰
不憚勞瘁匆匆別
烟霧蒸鬱蠻花紅
山川紆曲火雲熱
杲杲旭日組練明
昏昏暮雨笳鼓咽
平生壯志冀一酬
軍中苦樂那須說
掃盡夷氛慶昇平
共看椽筆書新碣

故劍

有寵妾而嫡失所者
其友贈之故劍感賦

土花黯淡蝕秋水當時腰斷白帝子鋒挫猶帶血痕殷
周旋危難救九死功成意氣凌萬夫腰間雙佩玉轆轤
珠裝錦帶光照座昔日寶劒塵模糊細看芒刃繡斑駁
不堪補履羞把握紫氣誰識射斗牛金精曾驚撼山嶽
吁嗟乎夏日團扇棄秋風深林鳥盡遂藏弓胡不常在
艱難中

端工行

蜀中信息巫有病延眾跳舞
雜扮男女及鬼終夜喧接

昏夜喧喧鳴鉦鼓大巫小巫鬧如雨少年鬼面抹青紅
雙袒兩肩旋風舞別有窈窕紅粉妝隨眾團團走如狂
四圍觀者塞滿堂人語聲雜沸螭螳是時月黑藏鬼魅

病者呻吟那能寐家人擾擾孰近前隨例跪拜等兒戲
終夜鐃鼓競闐闐酒肉如山坐華筵酬以粟帛出門去
迴視病者魂升天

擬題曉瞻張太尊太夫人篝燈課子圖

堯母深宮衍聖謨我皇孝治洽寰區慎擇方面無濫
竽曉瞻太守真醇儒太守幼冲鯉庭趨父書能讀色婉
愉蓼莪旋廢泣稱孤萱堂茹痛撫鳳雛多買詩書典裙
襦慈母嚴師一身俱寸陰分陰惜隙駒篝燈熒熒照庭
隅午夜迢遞鐘漏疎淒雨酸風歷居諸天陰月黑啼慈
烏阿母暗泣子吟唔手悲拈据口卒瘡呵責首敎硯田

蕪文藻已富心花舒高堂已瘁心血枯青鐙如豆鬼椰
掄堅心如石神匡扶青年甲第趨直廬天祿然藜校祕
書金蓮燭送耀天衢回憶短檠寒夜徂卽今五鼎奉甘
腴猶矢冰蘂念茹荼謹稟慈訓理名都民戴太守將母
呼錦城芙蓉千萬株和風煦日奉板輿賢母含笑心歡
娛子能報國吾報夫華堂舞彩紆紫朱養志不忘昔勤
劬繪像傳觀共嗟吁教慈教孝視此圖

題趙竹菴乘風萬里入峽圖

男兒生負昂藏之偉質萬里封侯欲投筆不善乘馬善
乘船胡爲踟躕守一室浮槎溯河懷張騫紅蓮泛海驚

太乙蜀道艱難上青天不如一葉凌波疾巫峽連雲吼
長風駭波倒流沃白日長年縮手孰敢前笑狎怒濤有
趙壹兩岍援聲啼正哀紅樹青山回頭失憶昔乘風順
江流鵲飛似箭心慄慄如馬如象石崢嶸林外斜垂練
一匹天繪奇景娛吾人恨不相逢共促膝手展此圖眼
忽明羨君溯流更安逸繹夫似蟻緣江行咫尺千里山
如櫛昂首四顧天地空醒醒每笑禪中蝨布帆無恙且
收藏中流穩坐翻書帙

題趙竹菴章山甫詩卷

萬點蜀山供奇賞萬里蜀江浩奔放豪士收入胸懷間

一吐萬石洪鐘響范陸宦遊畱遺蹤每讀佳什生遐想
五百年來風流歇寓公幾人畱天壤吾東漁洋賦皇華
輜軒一至神悵惘錦城絲管日紛紛如雲冠蓋結交廣
誰從衙官求屈宋一時清才竟得兩雅調翩翩趙倚樓
睥睨千秋恣跌宕章子崛強霸詞壇晉楚角力爭雄長
褒然巨冊唱和多連朝快讀精神爽姑射仙子姿綽約
龍伯國人形骯髒豔如時花映朝霞肅若鳳闕排鸞仗
詩人原具造化心鼓扇洪爐鑄萬象大雅扶輪欣比肩
珠光玉氣相摩盪點綴山川振雄奇從此風月歸吾黨
我如邾莒隨會盟語澀氣孱每泚頽縱觀却愜平生懷

萬斛明珠落吾網船山

遼寧人

守萊著作繁表海雄風日

騰上二君宦蜀鴻爪畱後有作者應傾仰

和書碩農夜電

客來示我夜電詩詩詞恢詭驚肺腑要我速和志先磨
夸父逐日竄步武憶昔北自燕京回車走中途日未午
黑雲如墨天青黃震雷轟轟催急雨僕夫鞭馬但疾馳
恨不兩腹生鳥羽後如追騎不暫停狂風怒吼樹掀舞
須臾鼎沸千軍來倉皇四顧無環堵武安瓦震宮殿搖
馬陵伏兵飛萬弩列闕霹靂助威聲似排八陣湧蛇虎
我疑上帝誅神奸劈山倒海揮雷斧天竈玉龍三百萬

無數明珠一齊吐又疑玉女博戲酣碎斫瓊瑰擲下土
大地混茫天欲傾宮拆水晶誰能補俯首車中空咋舌
四馬不驕但搖股儔侶呼呌耳不聞覲面咫尺恨莫覩
風捲雲馳瞬息過後陣殷殷猶擊鼓豪暴恣睢快一時
項籍用兵不師古大木摧折麥隴平遠村人家皆閉戶
太息作客行路難不料安居亦道苦屈指前事數載餘
我今讀詩髮森豎勉作俚語步諸賢有如霓裳難爲譜

題梅樵黃少府風雪運糧圖

劒戟簇簇立萬峰六月飛雪雲漠漠禽鳥未敢棲絕壁
裸夷盤踞窟其中一徑微茫盤上下怪石磋砣迷西東

奸匪焚掠村烟黑殺人喋血烽火紅從戎竟壯書生膽
 叱馭身穿虎豹叢千軍待哺呼庚癸饋餉不繼化沙蟲
 累累背負人爭奮一行魚貫摩蒼穹騎馬指揮立峰頂
 意氣豪放顧盼雄丈夫生平志報國恨不披堅挫賊鋒
 幸効臂指竭心力跋涉那復畏途窮北風裂膚紅旗折
 雪泥沒脛冰滿弓馬如蝟縮鞭不動冒險不死憑孤忠
 戰士宿飽終盪寇袖手歸來不言功聊買生絹寫奇景
 山川厯厯點綴工如此壯遊良不惡何必侈口銘鼎鍾
 爲潘紫垣題鍾馗騎牛張蓋圖

先生遊戲太頽放誰矜纖毫寫怪狀鬚如蝟磔滿兩頰

深目濃眉更廣顙不尋捷徑向終南田閒騎牛任浩蕩
路旁或來鬼揶揄朝衫雖破骨骯髒鬼有簿招古人
騎鶴騎驢皆同黨五岳倏忽萬里遊何妨張蓋乘興往
玉瓶飲盡醉難支仰天大笑一撫掌碩腹便便羅萬軸
安用進士題金榜每鄙學士送窮文欲作老聃過關想
腰閒無劔多笑容想見先生胸襟曠想見先生胸襟
曠

題唐二羅羅漢洞詩集

我聞三神山山在有無閒海水汪洋數萬里我欲駕舟
風引還有客投我詩一冊乃記蓬萊第七之洞天二山

風雨爲離合外人遙望空雲烟鐵柱石橋橫空起往來
游戲多飛仙髯蘇曾來記佛跡風流消歇將千年二羅
先生耽邱壑窮幽探勝屐齒穿忽造古洞非人境丹竈
石榻尙依然前身應修無漏果此中幾載眠蒲團蒼松
怪石森滿眼峭壁百丈飛流泉風中蝴蝶閃金碧月下
綃袂來翩躚禪心不動堪歷試胡爲今日現宰官竭來
共插塵中腳僕僕蜀道歷險艱我欲從君返初服舉手
笑拍洪崖肩此編歷歷爲鄉導飛身直上蓬萊巔

題薛濤詩思圖

天下幾人解憐才收拾珠玉出蒿萊天下幾人真好色

羣繪傾城畱翰墨蜀江水碧如玻璃映水芙蓉帶露垂
美人樓在芙蓉外曉起清江照畫眉風流消歇彩雲散
畫圖爭識春風面伸紙沈吟如有思閒愁幽恨何人見
枇杷深巷月黃昏翠竹籠烟空掩門世閒難覓元才子
得來佳句與誰論幕府當年開東閣綺筵歌舞樂復樂
如此豔色如此才忍使風塵久淪落蘭麝香銷古井寒
想像冰姿翠袖單頻喚真真懸素壁是耶非耶來姍姍
華陽學博朱蘭舉謁選入都以詩畱別諸友竹菴
示余囑次其韻

余髮種種猶鬢髻入世煩惱思爲僧五斗折腰愧元亮

仙舟共駕懷李膺捧檄萬里風塵倦建樹豈有機可乘

欲進不能退未果悶鑽窗紙似蒼蠅幸接名流詞滾滾

謂趙張
章諸君

唱酬快意得未曾掣鯨碧海逞巨手放眼遠送

摩天鵬傳來一詩更奇肆萬端離緒懷良朋大雅扶輪

追正始薪火將滅傳一鐙波瀾橫逸骨崛強此才豈可

計斗升恨與朱君未把臂拍案歎咤蹶然興世閒官數

廣文樂才人屈就聲價增苜蓿盤空圖書滿寂寂懷抱

清如冰鱸堂多暇文士聚雄談那顧流俗憎嘯傲花竹

真吏隱訟庭敲朴羞未能胡爲謁選上京國目覩俗狀

弗思懲宦海茫茫渺畔岸弋人耽耽多繳贈諒應知已

無勸駕臺使敦促頻下徵鳳羽文章不自耀明珠蘊采
眾口稱先生原非熱中士久霸駭壇肆憑陵牛刀小試
籍風雅問民疾苦周田塍回首錦城渺天末芙蓉萬樹
雲霞蒸青山環匝舊廬在詩書幾世傳雲仍白雲出山
爲霖雨壑間寂寞垂蒼藤何時光儀接末座珠玉聲咳
欣親承奇氣橫絕避三舍試看下筆蛟龍騰今古懷抱
藉一吐胸腹洞然消瘕癥今夜和詩燭見跋屢聽衙鼓
聲鑿鑿月光如水浸堦砌開軒四望天宇濶

題楊未禪刺史側理紙

上古書冊所青竹魚網作紙誰寓目後世最重楮先生

貴比琳琅資簡牘時易代遠歸消亡過眼雲烟渺難復
昭陵繭紙墮劫灰十樣蠻箋乏半幅側理會聞賜張華
先生得此竟何福海苔製自南越來亂紋如織波濤騰
大可徑丈厚半分妙合無縫何由續屈指太始千餘年
戈鋌屢經幾蠻觸銅駝埋沒餘荆榛鐵硯銷沈付樵牧
紙本易毀非真堅誰爲收拾祕篋積碎裂或將破窗糊
適用聊供醬醖覆博物書軼紙徒存流傳未飽蠹魚腹
不會書畫經名流有如貞士人抱璞潛蹤何地如桃源
世外全真閱陵谷絕無華彩炫世人古色闇淡甘屈辱
先生搜得什襲藏佳客傳觀先薰沐呵護年久有鬼神

我手未展心頭肅澄心堂紙亦擅名對此退避甘奴僕
吁嗟乎滄桑變幻彈指間古物聞名空追逐巧偷豪奪
費機心奇珍當前棄不蓄忽遇有識加品題價論千金
未肯鬻今朝把玩欣幸多挾詩一冊常披讀

刻題詩
一冊

集似俗無塵籀聽梅樵彈琴分韻得賓字

世事萬變爭翻新古樂淪亡難具陳惟有素琴遺製在
伊誰識曲聽其真翩翩叔度富才藝幽齋張筵羅眾賓
命奴手開古錦囊拂拭七弦淨無塵恰值日暖風和際
海棠含笑柳含顰爐烟初裊簾不捲四座無語方逡巡
疎疎似滴梧桐雨良夜迢迢蓮漏勻野曠天高月華靜

雖雖鴻雁來江濱遺韻蕭寥宜高士雅態踟躕想美八
變調似欲裂金石幽怨如可泣鬼神渾渾元氣溯太始
一曲能迴萬物春擾擾蠻觸世途隘人習能使風俗淳
撫摩此器存古意宛如一髮引千鈞緬懷昔聖哲遺訓
無故不撤良有因况聞家藏希世寶梅樵尊人得文
文山琴名連珠文
山連珠什襲珍起懦振頑聲駿厲志士激昂節義伸今
日幸遇良宴會融融樂意對芳辰斜陽欲盡猶未盡遊
絲駘若拂冠巾座客舉杯屢勸酒吾心已醉如飲醇

有感

萬山孰搏埴獨置兩川多耕稼田土窄盜賊穴爲窠李

白太息蜀道難杜甫旅行淚滂沱我欲驅之東填海不
然堆積沙漠西渡河秦皇鞭石不到此五丁開鑿勞斧
柯巨靈昔劈太華日望此躊躇不敢過恍若滄溟波濤
湧起伏奔騰鬱嵯峨神禹生蜀地狂章童律戰百魔嗟
哉治水不治山安得長劒倚天磨夸父貪逐日胡不助
我移崇阿龍伯國人曾釣鰲未敢囊括大塊擲洪波劒
門雄峻三峽窄岷嶓萬里接三我英雄割據憑險阻屯
聚累代煩干戈無怪人欲罪真宰鑊鋤無力喚奈何蒼
穹亦欲畱作柱首觸不周神所呵嗚呼愚夫之愚不可
及徘徊萬峯之下惟吟哦

食新荔支

飽啖荔支三百顆坡老不恨來炎荒豈知蜀地有佳種
妃子一笑飛騎忙我生東海飽楂梨空聞有譜安得嘗
遠來捧檄錦城住同儕共笑北地僧代庖小邑山四圍
苗民睢盱遊藏皇五月炎蒸難止渴驚喜攜來滿筠筐
劈破絳殼出白玉入口消化流甘漿摘來僅行三十里
色香未變風露涼所惜肉薄核頗巨持較閩廣羞應藏
物以希貴無定價偏強自大夜郎王先供大府挾籠走
知交分送誇甘芳

江安先奉
各上憲

聞道江船連盆載一株數

枚等琳瑯旁觀聚頤空垂涎

九重恩錫荷寵光我生

不解究滋味世閒熊魚久相忘葡萄石榴出西域遙遙
萬里難攜將若非移來中華種珍異亦覺非尋常安知
不較荔支貴大書史冊播芬芳我賀荔支無多樹更喜
生處在僻鄉

九姓土司
地有四株

賀友納姬

春風到處香繚繞檢遍名花仙品少藝蘭種蕙幾經年
望斷天涯拾芳草滇南才子最多情姹紫嫣紅着眼明
閱盡羣芳無當意阿誰名壓錦官城錦官城外錦江畔
有美深藏人未見由來女伴惜娉婷吹得瑤華落天半
熠熠瑤華低近人彩雲擁護畫中身驚鴻此日翩然出

誰疊紅箋賦洛神華燭搖紅光照耀雅宜金屋貯花貌
名士憐香初定情佳人卻扇先含笑幾生修到馬文園
香色蛾眉對遠山翠幙無風香細細雲屏有影珮珊珊
良夜迢遙錦帳暖海棠睡足東風軟鬧掃新妝學得成
背人偷把紅綃展鏡畔低聲媚玉郎問字修容盡日忙
篋中養紙芙蓉粉架上薰衣荳蔻香深閨從此修花史
樊素小蠻難與比東山絲竹繫蒼生美酒羊羔粗人耳
樂事風流屬少年溫柔鄉老勝登仙宰官妙試栽花手
仙子原畱種玉田誰知緣定三生契也自勞神萬選錢
江水滔滔連日夜江花豔豔經冬夏一枝穠豔喜逢君

十斛明珠難抵價劉楨平視願頻來掀簾怕遭鸚鵡罵

牛皮甲

在清溪庫貯破膽
對時獲之苗夷

犀甲輕矯奮爭先鐵甲耀日軍容鮮有客來談牛皮甲
清溪縣庫堆百千片片刀截僅方寸漬以生漆年復年
繩貫若銜尾片綴如連錢蓑可比其輕鐵未等其堅下
不掩慚上披肩矛刺不入矢不穿夷匪奔走履山川橫
突堅陣仰射天有甲足深恃那肯輕棄捐何故爲我獲
客云聽吾宣堂堂對陣無與敵操刃挫折似空拳蠻人
赤腳走如飛誘入深谷爭向前深谷徧布鐵蒺藜鋒利
刺足踣且顛捆縛如豕逃無路蹈藉死亡溝壑填出奇

決勝善用權破其所長攻其偏知己知彼計萬全能戰
能守可防邊吁嗟乎良醫無定藥牛溲疾可痊良將無
定律制敵謀如淵伊昔劉綎守斯地誘之出集聚殲旃
及茲瞻對破狂寇策定不懼道路艱始知大帥貴智不
在勇用眾那如威令專不信請看清溪庫欲將皮甲城
門縣

濁水珠

棧道旅壁題云壁間佳作甚多忽忽不及和俟再過補之十三齋女子劉漢青題

珠投濁水失光晶恨不搜取降六丁碩農爲我感喟與
旅壁會覘墨縱橫中有數行照眼明婉婉女史方弱齡
自言隨宦一宵停由浙入蜀從此經最愛過客詩句清

異口重遊期載賡鳳凰飛去遺彩翎入門瞥見惜娉婷
玉質未覩心憐卿拂拭依稀認小名往來胸次如絲縈
執裾問訊徧錦城空江無迹浪打萍席香三日憶郵亭
千古怪事吁可驚琴或供薪鶴遭烹飛花落溷逐穢腥
噉噉何處珠淚傾有客傳語未忍聽復覩題壁悲不勝
初言豪門賦小星繼落風塵無翅騰那堪回首百感生
吟絮咏琴心自矜顧影徘徊仙骨輕若箇夫婿龍可乘
蜀道艱難已堪憎旅館畱題對殘燈想像芳華歲頻更
約略窈窕門尹邢宜貯金屋護雲屏胡爲糞壤置瓊英
將無才富心瓏玲刻劃盡巧天所懲窗外細雨蕉葉零

酸風蕭瑟穿疎櫺若有人兮呼欲應翠袖單寒影伶仃
高懷雅抱得未曾惜無妙句書吳綾至今壁上墨猶馨
十三女子劉漢清

題顧梧生雙梧圖

樹人如樹木滋培良匪易樹木如樹人位置貴得地展
君畫冊意蒼茫雙桐百尺濃陰涼爭看枝幹排雷雨應
許飛鳴集鸞鳳自言當年勤灌溉移根卻自盆盎內造
化困阨奮力爭春露秋霜能久耐自從宦遊幾經春逐
羣聽鼓厭風塵微雲疎雨蕭蕭夜憶伴西窗苦吟身卽
今材堪中琴瑟大匠屢顧蒙物色孤高落落陰苔自撫

摩猶爲人愛惜布帆遙指大江東養病家園去匆匆三
徑未荒看疎翠冷落錦城百花紅想像三閨讀書屋綠
雲覆徧嬌幽獨莫言材大難爲用荷天滋培生意足

爲張惺門題一帆順風圖

我自海右來狂醉錦城酒萬里岷江傾雪山波浪怒挾
蛟龍走未得乘仙槎每倚南斗望欲泛野航學杜陵春
水船如坐天上忽逢佳客懷抱開捧檣遙自越王臺浙
東江山看未足巫峽奔流幾溯洄人生快意會鵲起乘
風破浪幾萬里鞭打六龍走神山天地納入孤舟裏世
上紛紛蝸角爭風波處處浪未平吉人從來仗忠信心

狎海若鷗不驚中流如見角巾影天光水色碧千頃不
著紅蓼與白蘋羨君直造空明境舉杯四望樂未休知
心似有月當頭他年康濟巨川後還能勇往退急流

題錢香士陣雲立馬圖

代作

丈夫不得輔佐天子立廟堂鞭笞四夷盡來王便當寢
干枕戈滅賊盜衛護生民保嚴疆西川蠻夷時鼠竊山
爲巢穴劫資糧我出彼歸歸復出狼奔豕突勢披猖屏
山小邑警風鶴錢君攝篆固堤防馬踏亂山巡邊圉身
歷險仄冒風霜天寒雨雪冰滿衣呵凍草檄十指僵築
堡立卡一百八臂指聯貫綱維張朝供援軍屢千緬暮

督饋餉粟萬囊君才肆應何整暇擒渠斬馘寇遁藏平
日服君文事勝不謂耀武履我行袴褶攬轡立高峯猛
氣逼人似鷹揚寸馬豆人毛髮動紅旗倒捲朔風涼黃
雲毒霧深箐黑燐火夜出飛紅芒四民安堵魂不驚眼
看天際落欃槍小試彈丸別利器此才胡可斗升量我
欲匹馬短衣隨君後看君指揮壯士射天狼

偶作

天不能雨粟地不能出金錢胡爲生眾庶熙熙穰穰億
萬千川中天府稱沃野江流灌溉屢豐年何處旱魃忽
爲虐婦子呼號水田乾去歲乏雨今歲復然粗糲食盡

草根當餐木皮剝削與人同寒嗟嗟更有割愛烹兒女
腹雖果痛徹肝行路聞之涕泣漣漣或恐生攘奪貧死
富亦不獲安曲突隱憂關國計厝薪偃臥火未炎人爲
天地生天地胡不憐風俗日偷薄忠信禮義盡棄捐利
僅如絲髮骨肉逞戈鋌帝心从怒默無言降以凶荒相
熬煎造化消息未易測徒令司牧心悁悁山左連饑幸
有秋畿輔雨雪未聯綿天子旰食深宮省愆西南一
隅殷憂實繫蠻夷蠢蠢肆劫奪戍卒枕戈未安眠告饑
復聒噪大吏重仔肩安得雨師風伯爰約束甘霖普洒
徧垓塹民俗和帝澤寬朝夕祈祝望青天

望峩

昔讀詩文仰三蘇如見大峩山突兀故園跼守嘆無緣

夢寐想像神飛越一朝鼓棹順江流

丙申署篆南賓東下

風吹一

瞬來嘉州空翠插天拔地起白雲蕩漾豁心眸作鎮坤

維控梁益八十四盤費冥搜江如玻璃照蛾眉側思明

月半輪秋兜羅綿中佛光現遙睇不見空煩憂我欲蠟

屐將糧裹鐵瓦殿裏學佛坐聖鐙飄忽半巖明天花續

紛當空墮西顧雪山玉嶙峋

山頂可望西城雪山

下視塵寰熱如

火可惜輕舟去如飛白毫千片映斜暉迴望碧岫影依

微雲中仙人手頻揮嗟爾食肉徒癡肥天生靈境與世

遠太息細塵沾我衣

題鄆縣鄆筒池亭爲李恭甫同年

有二井傳云山
濤作鄆筒酒

李白豪飲似長鯨曾築酒樓在任城任城李君來遊蜀
鄆筒美酒誰同傾我聞鄆筒甲天下平生思飲無從貰
愛君風流意蕭閒閒來池上傾杯舉古來勝蹟多模糊
韻事還應屬吾徒每惜苔深迷客屐空聞鳥語勸提壺
仙吏舉廢兼好古肯教臺榭久荒蕪花竹扶疎幸無恙
方塘更喜澄波漾雕欄幾曲護平橋耳目重新客疎放
絲絲秋雨錦城西芙蓉零落寒蟬啼青蓮仙去酒徒少
明月重臨舞袖低我欲從君池畔坐會須一飲醉如泥

鴉片烟

余少時未聞其名過四十歲聞省會間有嗜之者大都蕩子遊棍及衙署長隨人乃漸及市鎮商賈漸及閭里紈袴俾畫作夜百事俱廢傾家蕩產身命隨之諭之不聽禁之難止甚至貽憂朝廷聊述短歌以誌

揮金如土性不改黃金換土貧不悔饑不可食較食急億萬性命填滄海初聞人嗜淡巴菰繼有鼻嗅香疊疊年來更尙蘭州製吸烟以火濟以水何意土自洋外來化作濃膏擬鳳髓一吸精神健再吸支體盡暢美遂令

寓蜀草

卷二十七言古

言

天下耽逸豫不願求仙願作鬼與室無風簾幙垂繡榻
錦茵列銀匙金缸花燦紅影搖妮妮有人同臥起一管
如笛珍寶嵌互相勸酬味彌旨俾晝作夜百事廢斯人
終當以樂死壯者庭羸富者窮窮者效尤遍閭里可惜
金錢數千萬盡流海外何底止邊臣暴怒絕西夷千箱
土膏盡銷燬夷人失利逞兇鋒海舶直闢長江裏貽憂
廊廟宵旰勞奸人甘爲夷人使皆漢奸爲導內地更種罌粟
花煎汁作膏強效彼初縱淫慾作媚藥兼誇賓朋示豪
侈癖入肺腑毒難除至期不吸形神委奪其酖毒不肯
聽覆轍接踵紛紛是我欲作歌警斯人斯人聞之但笑耳

支機石

黃河之水東復東靈源上與銀河通俗客夢寐那能道
瑤臺玉闕排虛空何人乘槎探星宿天孫織錦欣相逢
臨別贈石意鄭重至今磊砢留蜀中苔痕斑駁繡滿體
佳話畱傳驚兒童疑自媧皇百鍊後偶餘一拳在璇宮
星榆月桂相掩映高峙銀潢碧玲瓏想像來往鳳銜梭
萬縷雲霞雜青紅此石支機如砥柱怒號萬竅任天風
又想載歸衝駭浪攫奪不復畏蛟龍元圃琅玕那敢竝
西域葡萄載許同波新碧眼不能識但驚深夜光吐虹
漢武域外求珍怪開鑿道路煩唐蒙何不搜羅歸上苑

委棄荒草經千冬星辰謫降人所惜誰施斧鑿加磨礱
春來百花滿錦里繡錯不及雲錦工織女機絲虛夜月
杜句雨淋日炙惱天翁勅下六丁來取將指揮列闕走豐
隆仍歸天上伴素娥下視五嶽非穹窿

題黃梅樵小照

高山中古松流水映
坐其閒童子抱琴侍

每嘆江湖羨廊廟身經仕宦羨江湖梅樵才氣脫穎出
志在山水何爲乎年少不廉詩兼畫琴韻蕭疎指法殊
奚奴清晨至示我一巨圖位置邱壑裏形貌清且腴四
面萬仞疊青嶂流泉曲折噴璣珠上有欲動不動雲下
有古松三五株境似洪荒無人至君獨孤坐學跏趺松

聲蕭寥入太虛泉聲斷續密復疎天籟傾聽譜難摹一
心默印非模糊安得從君酒一壺素琴不彈成虧無

爲章山甫題攜琴放鶴小照

我家子晉遊仙鄉跨鶴夜半空中翔縹緲玉笙吹不斷
月明如畫天風涼青田有種覓不得想像白羽徒傍徨
章子好鶴素有癖更蓄無弦琴一張雅宜置之邱壑裏
入耳松風譜宮商胡爲一官似樊籠逸翮不得排天閭
詩含元音追太古無譜有調聲琅琅閒命畫史寫幽趣
襟懷瀟灑非顛狂下與和靖爲伴侶上與元亮相頡頏
不屑腰纏十萬上揚州但看一放寥闊天蒼茫不必高

彈一曲要人和且令奚童收貯古錦囊從此游西湖泛
瀟湘擷昆圃之雲霞酌北斗之酒漿號天帝外臣聽廣
樂鏗鏘浩浩乎吾不得而追逐望蓉城兮天一方

寄韓百木代柬

時在榮昌

慨然焚硯且投筆謝別鄉鄰東裝出驅車已失秦山雲
回頭猶見東海日驚波萬里渡黃河洛陽繁盛今如何
長安宮殿劫灰盡太華如黛空嵯峨壯懷未衰身已倦
勞勞風塵歷郡縣棧道千盤穿白雲蜀山萬點驚初見
益州富饒控蠻方城中畫棟連雕牆濯錦江頭訪詩閣
浣花溪畔問草堂選勝不乏佳麗地知心不見徒傍徨

聊儗一塵如民舍米珠薪桂愁空囊前年南賓得藉手
政拙那能稱慈母案牘勞形心已煩未得閒窗傾一斗
今歲昌元猶故吾往來冠蓋織道塗餽牽酒漿細事耳
閭里輿馬頻追呼一別四載鬚髮皓鄉鄰幾人墳宿草
童稚交遊盡老蒼百木先生顏色好書來怪我音信疎
幾度唏噓傷懷抱男兒每恨不成名一登仕版勞遠行
鴻雁南北各鄉縣苔岑異地難尋盟隴雲秦樹迷遠望
春風秋雨增離情夙昔雞窗共弦誦文壇盛名推君重
轉瞬年華付逝波始信才大難爲用豫章千尺排風雷
駿驥逸足超駑駘家園天倫有樂事何必奔走逐塵埃

高歌寄君聊代簡料得伸紙笑銜杯

仁懷賊

九月二十八日綦江縣穆王瓚來重慶告穆繼賢與貴州仁懷縣袁天綱作亂

鳴梟夜叫飛火紅匪徒嘯聚鳴刀弓阿誰赤手撿蛇虎

頃刻棄甲化沙蟲

綦江章外委往捕被賊兵亦受困

據險築砦守彌固

砲石如雨難仰攻

初起鐵匠壩後據方家溝

屢勝氣驕勢莫當

賊寨負山

枕溪築牆堅固僅一綫路可進兩敗黔兵奪勞山砲四尊自牆孔打傷官軍十二月初二殺猪羊擊鼓甚囂

長圍漸合仍自雄

貴州余提軍福協鎮慶方伯四川張鎮前後領兵至

假托神怪

詭流俗

詭云神佛降生

僭稱王號驚兒童

有困山大妖女走馬有名目

妖女走馬

突堅陣蠻刀繡襖矜花容

紅衣女賊稱黎山老母又有千手觀音等名

是時

風鶴多警報一隅震動撼鄰封蜀甲嚴堵團鄉勇星羅

碁布水不通螳斧奮怒方旅拒飛烟一道砲直衝

十二月初

七黔兵由正面川兵由背面夾攻一晝一夜至初八將賊巢攻破殺燒殆盡

焚巢難救須臾

死繩縛手足刃陷胸聚而殲旃眾稱快生擒首逆爭獻
功安飽坐享太平福胡爲倡亂勞元戎家室一旦隨灰
燼白骨蔽野覆蒿蓬我武維揚天助順如使蔓延禍難
窮憶昔教匪起川廣宿師八載國帑空山谷流血城邑
破艱難百戰人心恟初起揭竿數百耳縱賊貽患誰養
癰蠱茲小醜速撲滅四處奸宄銷兇鋒焰焰者息涓涓
絕我欲鐘鼎書勲庸嗚呼我欲鐘鼎書勲庸

紀事

淄川西關孝婦河夜半水陡高數丈門外石牛

漂去數里雉堞崩壞廬舍隨波去者甚多

戊戌事

般陽百雉屹崇墉石橋新築

戊子修

互長虹夜半忽聞蛟

龍吼雨飛雷擊挾狂風有如項羽百萬卒排突誰敢當

其衝大海騰波鯨魚立傾翻貝闕倒龍宮石牛橫臥鎮

水怪頃刻漂沒難尋蹤婦號兒啼驚倉卒兩岍焜耀鐙

火紅

居民見兩岸燈明蛟龍目睛也水面露

鬼神遷移

避阨劫

居者有夢神令其同遷者未幾廟沈闔家漂去

吁嗟怪事驚老翁吾邑

萬山作屏障城垣壘石堅如銅數百年來絕水患何意

陽侯急相攻雉堞頽落如飄瓦廬舍隨波類斷蓬春夏

無麥蝗兼早望雨不降禱蒼穹一時暴雨翻爲害雖欲
隄防難爲功安得射潮三千甲助我奮怒挽強弓嗚呼
助我奮怒挽強弓

夜飲大醉

更漏初沈雲泱泱微雨蕭疎滴階響主人大呼開酒樽
賓客縱談興豪爽今我不樂復何如世人拘囚投塵網
目前錙銖苦營營人生能着屐幾緡太華峰頂吟謝詩
黃鶴樓頭被羽斃古賢風流幾百年勝事還應歸吾黨
酒閒瑣屑話故山或興嗟嘆或撫掌蒿目羣蠻肆披猖
戍卒絡繹縻國帑若箇請纓賦同仇快斬毒蛇縛狂象

書生弄筆付空談負此七尺徒髑髏遠困徵輸近苦兵
吾曹爲吏每泚頰且共銜杯翦燭花坐卜今歲慶豐穰
重慶閩屬
雨陽最調

裸裸

昇平四海息金鼓端拱垂裳千羽舞西南一隅分兩川
千里沃野號天府邊塞有地等甌脫包藏裸裸難悉數
萬峰插天雲霧屯緣岍窟穴長子孫略有支派無統屬
視強有力各推尊不解詩書與耕稼度外棄置任生存
連年出巢擾郡縣部落期會屢傳箭我出彼歸歸復出
往來奔命我師倦兵聚糧乏風鶴驚未得堂堂快一戰

漢人亡命此遁藏教之背畔更猖狂擄我赤子爲奴隸
朝爲犁田暮驅羊盤曲有路纔一線七月高嶺已飛霜
深箐密樹不逢人壯丁突出劫軍糧官兵積怒齊奮吼
誓滅醜類蕩淵藪前阻危峰未得上轉瞬羣蠻已跳走
健卒搜伏中毒弩大雪迷途寒縮手千蹊萬徑連黔滇
我欲阮要何處守我思武侯鎮益州選兵鍊將裕奇謀
胡不翦滅畱遺種厯代爲患費持籌視若癰疥無大損
潛耗膏血心煩憂吁嗟乎斬蛟屠鯨不足恐蜂虿傷人
實堪痛絃誦安能化犬羊搏擊有時困鸞鳳大吏愛民
視如傷分兵設汛捐廉俸團集鄉鄰練已成隨軍指揮

皆可用我勸流民早歸田甘霖遞沛秧可種枕戈子弟
矢同仇處處勁卒不在眾

海棠

昔見放翁賦海棠家家有樹如堵牆紅雲亂將錦城裏
低者三丈高難量我來川中急尋覓愛而不見徒傍徨
江上芙蓉亦寂寞屢遭兵燹根株亡傳聞昌元有異種
丰韻殊絕兼有香偶爾承乏愜素好訪諸耆老事渺茫
海棠堰舊有數株
有香久不存矣執圖索馬乏雄駿刻舟求劍心更盲

幸有一株訟庭側猩紅雨溼隨風揚有如苧蘿遇村女
今日姿貌亦尋常忽憶鄉園花自好開時滿院錦屏張

歲歲春回花如故年年客遊髣已霜東風力軟穩睡足
何人燒燭照紅妝空谷佳人自嫵媚翠袖單寒忽夕陽
偶書

生不能獻賦明光宮又不能作文諭蜀將路通便當跨
健馬挽長弓掃蕩蠻夷闔蠶叢胡爲碌碌隨人後低眉
俯首如孩童古來丈夫死不朽封狼居胥銘奇功白面
書生空奮舌畫餅何由將饑充聖主側席急求士破
格收錄羅俊雄軍驕難馭講法律士不宿飽勞元戎兵
聚則強分則弱千里綿延路安窮况復層巖共疊嶂樹
木參天霧濛濛我往爲客疲道路有長莫展難爲攻一

朝大雪沒馬鼻浴鐵勁卒化沙蟲大帥持重先講守新設
五處汎兵甲兵十萬羅胸中星羅碁布聯指臂招募少年壯
軍容以逸待勞反主客出則殲旃捷如風土著團練煩
父老有警則戰暇務農從此共享昇平樂偃旗息鼓慶
年豐

閱小說演岳忠武故事

十二金牌火速至將軍不得黃龍醉宋家自壞萬里城
金人酌酒檜得意忠烈至今炳汗青父老談說猶垂淚
枝葉附會自何人想村夫子略識字亦知演說多荒唐
自是人心感忠義痛斥奸相慰幽魂似欲呼冤動天地

丈夫烈烈豈惜生要使千秋無非刺奸人秉權快須臾
遺臭無窮豈云智莫言妄說亦妄聽春秋褒貶於斯寄

秦鏡

吾邑袁孝廉松籬得秦鏡王阮亭高念東諸前輩皆有詩今不知鏡所在矣

秦時明月依然在秦家山河仍未改美人化去隨風烟
香魂何處耀光彩阿房宮殿昔嵯峨曉起梳妝寫翠娥
三十六年君見否珊珊紅淚鏡中多咸陽一炬山鬼嘯
秦人啼泣楚人笑金環玉珥盡劫灰萬人白骨火光照
猶剩團圓月一規土花繡澀減清輝拂拭重磨還想像
六國佳麗誰瘦肥二千載事須臾景虎瞰龍興皆泛梗
從知萬象本來空鏡裏原無美人影詩人彩筆鬥新妍

鏡香詩存意惘然不如玉簫隨鳳去廣寒宮裏伴嬋娟

鬼車

卽九頭鳥
蜀地有之

天陰月黑積深霧羣聲啾啾浮空度

九頭啾啾俱鳴

滴血灑庭

人抱憂豈有積冤如欲訴天青日朗晴雲開汝藏何處
胡不來深避弓矢亦可憫特恐爾爲梟獍魁燕雀依人
在房舍居心無猜豈遭射碧火熒熒聚鬼魅徒黨出遊
必深夜幽氣逼人令人驚何如暗度且銷聲文明自有
鳳凰在雄鳴雌和天下平

遣興

獨立縹緲飛樓上翹首欲覽盡八荒西不見崑崙東不

見扶桑但見元氣與天合咫尺千里烟茫茫洪崖未拍
肩何處白雲鄉那知青冥外玉宇瓊樓射寒光罡風吹
我身搖搖心生恐懼難飛翔不如平地置足穩四體偃
仰臥匡牀蟻營一穴堪聚族鳩鷺騰躍止榆枋萬里乘
風驚雪浪堂坳芥舟比瀟湘

爲同年錢香士題貽經圖

懷才不遇身已老清白家世書爲寶可惜傳經手口勤
未得親見決科早卽令鵷鳳凌雲翔猶憶趨庭一編抱
我自總角侍嚴君朝夕督課費探討青雲同此期望賒
一第艱難今潦倒試披圖卷欣羨多快覩芝蘭非小草

吳越霸氣餘雄風派衍滇南奮文藻莫苦生前志未伸
有子克將前徽紹孫枝眼底又森森崢嶸未肯覓梨棗
還開青箱讀舊書蛟騰豹變慰祖考

桂將軍涵

莫道草澤無英雄奪槊舞刀疾如風爭先跳蕩鐵麥杖
負氣跋扈周盤龍有才莫展甘落拓劍氣夜燭牛斗紅
此際兩川豺狼起嘉慶元年教匪徐添德起達州王三槐冷添祿等起東鄉應之破邑
攻城焚村市婦子號泣何方逃亂民從賊勢莫止奮臂
崛起桂將軍將軍村中匹夫耳奸細來誘進甘言將軍
裂眦立誅死團集鄉鄰獨當先率數十人敗數千左右

官軍屢殺賊鼠子奔竄散如烟偶陷重圍敵競進匹馬
橫貫無堅陣有時閒道出奇兵從天降下揮白刃頭顱
紛落血亂飛併歸黃泉不及瞬將軍每戰手累功手握
大將符深謀非仗膽氣粗掃蕩羣兇靖疆宇坐鎮百蠻
敢支吾吁嗟奇才不世出貧賤白眼遭擲榆縱酒豪歌
無所事倚項黃馘老農夫

羅將軍思舉

龍駒蹀躞不受絆萬里方看流血汗銜轡控馭無王良
坐使雄駿低首嘆跼蹐不羈彼何人屢觸禁網幾殺身
足裏鐵砂疾如鳥蓬頭做禪目有神孤棲岩洞無安處

拚死溝壑逐飛塵不屑乘亂從寇盜卻歸鄉土禦強暴

拔出稠人艾將軍副將艾公識其才使燒賊營服君倜儻氣桀驚夜

半孤身入敵營烈炬一然聞鼓噪風狂月黑萬竅號旗

焚槍棄眾顛倒隱身馬腹隨奔騰回視火星飛萬道從

此賊匪識姓名遙望旗幟孰敢迎匹馬闖出一敵萬膽

大如斗心亦驚賊匪冉添元心黑重六斤當年擊劒爲豪俠椎埋少

年鬥狡捷父老患苦皆避藏高冠腐儒遭迫脅誰知身

登大將壇殺人如草成勲業金龍後起然餘灰趙金龍亦習白

蓮敦滋事平定亦復仗奇才兩雄崛起彈丸邑羅與桂俱東鄉

羅平之鄉駿烈英風每溯洞桂提軍已故羅鵬飛磨天鯨跋海

現爲湖南提督

雪浪倒捲錦雲開從今流品漫疑猜巍巍且築黃金臺
高歌大風猛士來

蠻刀

涼風颯颯寒生毛有客示我蠻中刀蠻兒野性最慄悍
睚眦殺人血腥臊子生彌月會親賓各饋精鐵代牲牢
一歲一度洪爐鍊柔可繞指勁斬蛟蓬首赤腳布纏腰
荒山校獵虎豹逃有時剽掠恐行旅雪光飛出魂魄消
深夜取視眼撩亂白月無色星動搖傳藥有毒弩斬竹
利用指獨刀爲利器珍重牛皮包湖廣昔日民驛騷猺
獐紛起兵戈交防身反兆殺身禍流落傳玩鐵未銷買

之百金不易得壯士佩之心膽豪安得孝友如王覽脫
手解贈繫錦袍

琉球刀

東南日本滄溟包俗好戰鬥稱雄鷺利刃販鬻幾時到
眾人傳看驚魂搖鍛非赤精鐵拭非鷗鵠膏胡爲寶光
射人目寒風陡起霜天高想當海舶來萬里鯨魚潛遁
蛟鰐逃巨浪如山到船消龍伯國人不敢驕昔聞大食
有寶刀近聞白刃數紅毛琉球之人最狡黠明季入寇
兵騰驍殺人如草不聞聲有時出鞘忽怒號腥氣疑帶
古時血過眼渾疑電光飄我朝恭順稱藩服干戈久戢

弓入弢家富詩書學禮讓紙入中國宜柔毫此刀雖利
價不高應化耨鋤艾蓬蒿

謝果堂太守以春江返棹圖索題

江波萬里如碧玉千峰夾岸青斷續兩岸不住猿聲啼
花落如雨芳草綠仙舟渺渺從此逝臨風惆悵歌一曲
會稽門第推清華埋輪風骨羣歎嗟

太翁薤泉先生忤權貴直聲振天下

登坡接武畱彩筆卓魯治績冠三巴先生一揮手不屑
牛馬走世閒腐鼠從人嚇詩裏青山我素有米船惟載
畫陶門且種柳惟有錦城不能忘父老垂泣說賢守更
有牽情屬吾徒摹繪行色一艇孤心逐江水流不盡那

得聳身入畫圖濫瀕堆前風淅淅入耳奔濤似箭激巫
峽連雲立鐵壁衡嶽迎人翠欲滴布帆安穩調素琴韻
帶三峽流泉音歸去東山畱別恨青天孤月江水深

題謝果堂太守平夷凱旋圖

萬峰插天迷背向羣蠻出沒肆劫掠深箐密林藏窟穴
狼奔豕突難扼吭奮起提戈成都守結束戎裝隨大將
蹊路叢雜未易尋毒霧溼雲蒸作瘴三軍趑趄催不前
仄徑危崖愁難上太守儒生行獨先切齒殺賊膽氣壯
毒矢硬弩未及發斂戢螳斧孰敢抗小醜跳梁自昔熾
諸葛多謀慎邊防至今遺種未翦除機則出塲飽則颺

綿亙千里連滇黔兵勞跋涉艱饋餉一朝獻馘俘蠻酋
背縛累累列戎帳逆者立梟降不誅積年抑鬱藉此暢
民樂耕耘匪遁藏我得披圖神猶旺當時袖手不言功
陰如長城作保障蜀江瀾瀾蜀山青太守去矣民惆悵
願將朱鷺鏡歌曲權當陽關折柳唱

爲陳芾村題美人圖

傾城顏色古今難美人祇合畫裏看粉黛易描丰神姿
最難秀骨韻珊珊懶向畫堂歌金縷低垂翠鬟嬌無語
凝眸斜盼若有思撩亂春愁不自主晴絲飛絮共悠揚
何事牽情欲斷腸細細重尋昨夜夢佇立凝神花樹傍

題楊未禪先生小照

未禪先生古爲徒年逾八旬貌不癯瀟灑標格擬松鶴
畫作屏風足楷模開篋示我圖一卷自云故吾非今吾
對面瞠目不相識但驚魁壘偉丈夫氣壓千人目炯炯
容顏雖異神不殊宴坐盤石對漣漪田田荷葉水面鋪
回首三十年閒事恍隔塵世半模糊僻壤邊域久沈滯
蠻烟瘴雨親馳驅同輩幾人秉節鉞歷年拙宦仍守株
天公作意相困阨素志倔強一胡盧錦江萬里瀉胸臆
隨手揮灑千斛珠酌以玻璃太白酒侑以琳瑯玉局書
况復當年氣豪邁那肯瑣屑計錙銖世閒炎涼態萬變

道心靜對寂如無
擺脫軒冤返初服
垂垂老矣友樵漁
鑑湖一曲何足羨
小園花木供清娛
獨惜卷中人英特
棟梁巨器儻散榜
我勸先生再寫照
青瞳廣額白髭鬚
疑佛疑仙任評論
平生自信道非迂
千秋自有不朽在
索之形骸迹已粗

送駱蓮橋罷官歸里

同年駱蓮橋旋浙作長句送行異日扁舟裝笠遲余於湖

光山色
開也

白衣蒼狗任風牽
蟲肝鼠臂皆隨緣
此身以外非我有
逐逐馬足徒堪憐
眼底宦場似傳舍
幾輩起舞矜先鞭
霜蹄一蹶終不振
從前百事付雲烟
駱君年少取科第

風流才調真翩翩一官破甑何須顧雨浙自有好山川
我聞西湖如西子陰晴窈窕俱生妍久爲物役不能脫
何由快覩雲水鮮有官亦須早棄卻恨君猶未識幾先
真我不隨物得喪真樂獨喜全其天與君棋酒且角勝
閉門一任雨連綿擾擾蠻觸勿掛齒以魚羨鳥夢憐蛟
蜀道艱難疊層嶂岷江悲壯涵秋烟王郎拔劍頻斫地
高歌扶風豪士篇有口還存老聃舌有怨莫奏蜀國絃
高堂奉母喜稱壽與子偕隱且歸田

烈婦詩

烈婦應城孫氏父名禮嫁淮川彭家潤家潤客遊燕趙有欲嫁之者烈婦守貞餓死

寒松抱貞心修竹挺堅節不厯冰霜酷那得表清潔吾

離鄉井近十年忽傳烈婦爲心折有時驚鳳候焉令無
端分飛何決絕妾墮淮海雲郎隨燕山月望夫山頭欲
化石杜鵑枝上空啼血何來強暴覲貞姿同室操戈勢
孤孑待月月不圓抱玉玉肯缺克全大義惟一死黃金
滿笥志不屑伯夷登山但採薇蘇武仗節只餐雪扶持
綱常丈夫事婦女蹈義更勇決身可槁心如鐵粒可絕
名難滅世路多險艱人生苦離別忍死猶望郎歸來氣
盡但願死同穴濟水茫茫家千里貞魂杳杳恨難泄故
里父老得聞知幾人感歎幾嗚咽

筒車

縛竹爲輪圓復扁截竹爲筒形製短以筒布輪雁齒排
以輪入水輪自轉溪流汨汨不暫停層層挹注往復返
天生萬物聽人用播弄化機如戲玩灌園翻笑桔槔勞
車無活水須人踐獨此迴旋任自然以筴通流無近遠
四野無人車自忙瀉玉噴珠餘波散地中風輪能知天
水中竹輪能禦旱我本山東識字農道旁見此驚雙眼
安得臨河二頃田畢世爲農從我懶

明鏡詞

滑縣強公克捷長子婦賊入署在門後以鏡擊賊斃

明鏡光皎皎照見妾顏色但咤貌如花誰知心似石門
內龜勉事舅姑門外喧呼驚有賊胥役皆倒戈死生爭

頃刻吁嗟乎紅顏嬌無力明鏡明鏡汝照我容顏願照
我胸臆我不能疆場馳怒馬又無霜刃握戈戟我將持
汝奮力擊一賊昂然入身匿扉後賊不測鏡光閃爍如
飛電血肉亂迸拚一擲一賊既踣一賊繼舉鏡照膽賊
奪魄吁嗟乎紅顏嬌無力勇實百夫特弱者投繯怯者
汚若箇婦女敢拒格人生拚死非甚難所貴臨危不惶
迫賊怒真切齒恨不卽寸磔手足釘門三日死生氣勃
勃怒容赫阿夫不在室阿翁死報國妾如明鏡圓不缺
心如明鏡光四塞世閒丈夫愧冠幘

銅鴨爐歌

漁人得之潭河腹有字曰銅雀臺東閣
又有孟德二字鴨立荷葉上寶光射人

黃鵠高飛橫四海何甘雌伏匿光彩阿瞞鼎足稱英雄
那肯老死脂粉中晚年分香乃垂淚銅雀臺高難穩睡
轉瞬邱壑瓦礫堆漳水東流咽怒雷千年銅駝埋荆棘
忽有銅鑪出水隈昔聞銅鑪恨未見含毫題詩空欣羨
今日草堂客攜來寶光四射摩挲徧巧鑄鴨形口微張
似欲長鳴望空翔睥睨漢鼎久貽臭獨遺寶鴨尙流芳
當日干戈門龍虎溫柔鄉裏能容汝老奸畫灰多祕謀
鴨如能言應有語吁嗟乎東閣寵妓錦帳紅繡履化土
隨春風銅鑪竟落書生手侍兒添香烟裊空我語陸君
酒更酌萬事過眼舟藏壑君家有硯心太平流傳吾邑

誰能攬安得共置几案旁賓主相視樂復樂

田家四時樂

上元已過氣暄妍細雨漠漠洒平田紅杏阡陌驅黃犢
綠楊兒女戲秋千何處巷中賣柜枚共看隴閒餉雞黍
農夫攜來話從容饁婦簪花相爾汝林外恰恰聞啼鶯
布穀和答課陰晴老翁昨日納租回商量作社買豕烹

其二

暴雨初晴山潑翠荒陂水滿鵝鴨戲綠樹陰濃臥疲牛
老農枕塊方酣睡軋軋縲車煮繭香活活流水長新秧
切瓜井畔爭消渴濯足溪邊共乘涼袒衣爭席隨處好

禮法何能拘野老過往貴人盛車騎僕僕紅塵正煩惱
其三

豆棚談笑雨如絲坐看禾穎珠露垂萬頃黃雲堆繡野
一林紅葉映疎籬共說豐年自昔有今歲畝更添數斗
觀優歡走牧豚兒賽神醉扶攜杖叟預籌旨蓄灌韭菘
織婦驚心霜露濃莫笑鄉閒俗樸鄙梳得高髻似城中

其四

三時力作此時安短褐被體不知寒牆根炙背黃綿襖
欄外飾觀黑牡丹穩睡不須晨起早鋤犁掛壁如珍寶
嫁女老媪議花鈿放學幼童爭栗棗鄰里互邀飲屠蘇

家家計日換桃符大雪壓簷不出門圍爐說鬼爭喧呼

試院老樹歌

嘉州試院舊建昌道署屋枕高岡古榕兩大株綠蔭壓屋夏日憩息清風

颯颯遙望九峯翠壁丹崖如置身九華也

突兀輪囷大莫容老榦橫壓綠陰濃六月炎蒸不知暑

赤日難透影重重官解自昔駐旌節何人手植根屈鐵

兩株離立爭雄長蛟螭盤拏逞詭譎上接灝氣蒼天低

下蟠九泉厚地裂意態雄傑軼繩墨終因得地免摧折

掄材大匠頗顧盼幾回婆娑歎奇絕高岡四望眼界空

九峯雲氣互明滅耳畔天籟奏笙竽面前翠屏參差列

文星夜靜吞光芒木魅退縮走顛蹶枝榦能排半空雷

鱗甲猶帶太古雪翠幕沈沈抵萬閒厚積風濤蓄未泄
如斯大木蔭庭除搜剔何須到岩穴千載疑有鬼神護
霜壓冰欺等閒閱幸全天年甘不材胚胎中有元氣結
吁嗟乎孔明廟前古栢蒼青牛文梓敢雁行從來無用
有大用令我對此心茫茫

題趙稚竹輕舟出峽圖

丈夫鬱鬱不得展跼促一室縛如繭縱能讀盡萬卷書
耳目閉塞氣骨悞稚竹少年志激昂揮毫落紙生光芒
卓哉竹菴有佳兒貧無餘物惟縹緗三峽倒流風浪湧
遊子裹足心惶恐羨君談笑狎波濤扁舟溯洄志何勇

赤甲黃牛天下奇，猿聲清徹杜宇悲。千古詩人紛在眼，
江山如故待新詞。昔年曾題竹菴圖，一紙萬里乘風咫尺耳。
竹菴有萬里乘風入峽圖，嘗爲題之。今日又得題此圖，喬梓先後真
婉美。飄然布帆，又向東歸。舟難挽，惜恩恩錦城一面無
多日。寄來佳句清如風，未得離筵奉杯酒。贈詩如雲當
折柳。來書云：贈行詩百餘篇。客裝收拾珠璣滿，臥聽江干蛟龍吼。

老鶴

老鶴健翮橫九州，俯視凡鳥羣。啁啾朝來蓬島仙，爲儔
暮翔閬苑栖瓊樓。白雲縹緲瑤泉流，舊巢古松蟠蛟虬。
上溯堯年歲月悠，一鳴一舉三千秋。滄海幾變爲青疇，

倏忽城郭埋荒邱雞鷺爭食心所產鵠搶枋榆將何求
蝸角酣戰紛戈矛莫辨螻蟻與王侯紅塵百丈徒煩憂
安能拘牽若籠囚鳳兮鳳兮可與謀清霄長唳聊同遊

烏哺雛

烏哺雛烏哺雛禾稼已收百草枯霜風刮地起寒氣皴
肌膚此時日暮雲模糊眾雛苦饑羣號呼老烏老烏甘
勞瘁嘴距遍索顆粒無幸得半粒珍如珠饑不下咽還
哺雛老烏日漸瘦眾雛日漸腴振翼凌八表箇箇擇匹
相歡娛天寒日短朔風粗可憐饑凍有老烏眾雛分飛
各已領雛迴思已身受哺時老烏野外口卒瘁嗚呼老

烏野外口卒瘁

題韓文公魚躍鳶飛字

石刻在陽山縣潘紫垣尊人作令時捐來

堂堂儒宗樹偉節一藝擅名詎所屑載道文章首昌黎
衰起八代力屈鐵排斥佛老闡六經何暇染翰問筆訣
揚來四字蛇龍翔翩然欲仙丰韻別是時貶謫宰山陽
侏噉幽憂應鬱結鳶飛魚躍露化機緬懷胸次融冰雪
有唐書家各爭長褚虞歐柳推前列專門優劣較毫釐
如此超詣歎奇絕道力靜深與天遊但以神運形迹滅
文筆崛強詩排寡未藏鋒稜費剔抉偶然作字入逸品
想經歷鍊豪氣折遊儵出水樂自然輕翼凌風纔一瞥

乃知大儒包萬有游戲偶傳敢輕褻至寶還應什襲藏
斗室懸壁自怡悅阿買更工八分書惜無墨迹畱殘碣
夏日荷花盛開落後僅存一花嫣然獨媚爲賦此

詩

連朝看荷花露新紅妝競出不染塵先開零落後突起
尹邢爭妍工笑顰幾番蓮房老結子葉大翩翩翠覆水
又如宮女閉長門青衫憔悴髮不理繁華轉瞬古今愁
風雨離披不耐秋忽放一枝矜秀豔晚香新粉似含羞
從來美人稱絕代孤芳肯入五家隊無人妒寵更堪憐
蟬聲寂寂斜陽晒

桓侯鞭

桂提督涵得桓侯鐵鞭重五十斤長六尺送往閬州懸墓前

黑雲壓營旗欲折
瞋目大呼膽氣決
丈八蛇矛左右盤
以短濟長更奇絕
手掣虎尾舞如風
五十斤重六尺鐵
匹馬入陣萬人摧
模糊盡是敵人血
漢家王氣終火井
焰不紅有刀不斫
嚴顏頭有劒未刺
曹瞞胸但恨鑄錯
不繼壯繆後荆襄
倚角成大功我朝
育虎將崛起忠且
壯當年滅寇定兩
川鐵槍一桿無與
抗遺器傳留忽入
手緬想英風神愈
旺魑魅白日俱遁
藏壯士袖手敢相
傍敬奉靈祠慰忠
魂一物千秋大義
存抉破疑冢七十
二鞭尸三百看血
痕月黑半夜作雷
吼將星垂芒天地

昏

子龍盛

在四川某縣廟中流寇之亂失去今所懸乃別鑄者

丈夫功名在鏖兜蕩滅羣寇匡九州偉哉子龍通身膽
長坂一戰功誰侔力爭漢中扶危運曾卻曹瞞萬貔貅
脫胄露面人爭看飛將骨相宜封侯仲達巾幗何足道
魏王九錫亦沐猴豹死畱皮龍脫甲一物流傳足千秋
明季寇亂如鼎沸竟墮劫灰杳難求後來重造如磨鼎
凡鐵無復光氣畱吁嗟當時無虎將夔門失險神鬼愁
誰擊諸葛鼓誰執翼德矛虎頭燕頤戴鐵盔誓不滅賊
心不休胡爲乎棄甲如山爲纍囚

記異

老農侈口談五行金生水旺言可憑昔記鼓浪飛長鯨
今屬子年又逢庚吁嗟三春枯旱不得耕萬眾祈雨鳴
鼓鉦忽然翻盆雨暴傾千村號哭萬壑盈秋闌士子困
旅行踟躕不前郵舍停一夕陡漲蛟涎腥急急登樓望
眼驚千人高處逃微生駭浪一激危崖崩頃刻汨沒不
聞聲浮屍亂漂龍鼉爭太和鎮事節使星馳阻路程江濤突
起圍高城轉而祈晴不肯晴雨師奮怒轟雷霆風伯助
勢山谷鳴對面不識畫昏冥人鬼錯雜雲霧生魑魅吐
火形猙獰桑田漂沒爲滄溟紛紛號哭多窮氓我皇

當今政肅清調和二氣歌昇平胡爲陰盛非休徵內無
女寵鬪尹邢外無柄臣亂廷評或謂夷匪肆侵陵浮海
弄戈螳臂撐朝廷命帥統勁兵樓船下瀨方揚旌且
喜晚霽小窗明戲拈秃筆聊適情

送楊纘亭赴戎邊

男兒生當閔世變慷慨爲國當一面不能提兵萬里制
強敵亦當慎固防邊息傳箭小醜跳梁何足誅蠻性飄
忽若飛電往時命帥擣巢穴未得堂堂會一戰君今乘
障備折衝幸遇盤錯利器見吁嗟窮山劫掠頻瘠田荒
廢求誰佃父老破膽驚風鶴流離敢將故廬戀自古循

吏不矜才調和軍民室家奠我往爲客居則主閒暇期
將士著練孤城嚴閉肅弓刀八月天寒飛雪霰異日功
名在兜鍪卽可從今焚筆硯

署中海棠含蓓蕾如指大時方孟冬

孟冬初寒凜霜雪蜀地炎燠氣候別梅未含蕊鐵幹撐
海棠一枝紅綻裂誤道天韶抱冬心深愁躁進元氣泄
眾卉方斂爭出頭美人含笑先攀折

扁崖子

危崖崩落逼人冷溪流喧逐氣力猛亂石排空如馬牛
兩壁夾束誰能騁何年五丁初開鑿元氣混茫匿日影

仄徑斷絕木接聯徒旅送目先縮頸下與千步徐移
捫衣不瞬示暇整昔行棧道嘆奇險閭王逼危及鳳嶺
趨來東川飽閱歷山狂谷很更粗獷人生樂土果何方
行止隨風如泛梗習慣險惡猶心悸自愧養氣未專靜
日晚旅館解行囊秉燭暫休羅杯皿

放言

男兒身當行萬里飽觀嶽峙之山浩蕩水又當身經萬
變閱恢詭可驚可愕歷悲喜開拓心胸吞雲夢萬卷紙
上陳言耳我愛騎鶴之仙人扶風之豪士耳畔厭聞蒼
蠅聲餘子碌碌何足齒前有千古後萬年日月出沒循

海底蠻觸戰爭化飛塵黃河如線岱如砥何況逐隊營
錐刀市僧交歡良足恥誰將腐鼠嚇鸞鳳嫖婦欲驕西
施美紉袴醉夢徒然生西山槁餓今未死黃鶴樓畔可
把杯蓬萊閣上御風起安能伏首處蹄涔擺脫萬緣如
糠粃春風駘蕩花亂飛細雨霏微灑蘭芷睡覺鳥語頻
喚人先生無言忘彼此

贈別章紉香

紉香久已稱詩豪才情逸宕薄風騷小巫一見氣阻喪
偏師孰敢輕身挑來茲三榮作賓主笑言欵洽如素交
下筆千言頃刻就似飄落葉填空濠雷霆戰鬥風雲湧

金石迸裂鬼神號擲我數冊墨淋漓讀罷仰視青天高
署中西園景蕭散清和暇日引同曹先生嗜飲稱大戶
不論斗石呼香醪池水空明淨如玉高吟數首驚潛蛟
我欲作詩頻縮手猥以案牘自解嘲歲云暮矣先生歸
惆悵無人爲捉刀李芳谷詩冊
倩爲代題來年大江春水漲還望
急急理輕舸

偶書

入天門擊靈鼓猛虎怒吼傍徨無侶玉闕瓊階列仙官
雲霞擁護佩珊珊下土蟣蝨臣草衣木食哆口欲何言
下界魔王食人萬人怕嶽瀆神祇具羊酒雲車風馬方

遠近上帝赫怒眾仙畫策勅六丁六甲雨師風伯蚩尤
旗長連太白天狼搏噬旄頭黑下掃羣魔使無迹下土
方揚塵飛起冰車與刀輪拔山倒海役使遊魂陰陽舛
逆天地爲之昏藐此么麼萬類困掀簸天神斂避風雷
息火阿佛慈悲收召惟我巴蛇吞象腹已果長鯨千里
吞巨舸馴擾未必同參龍淮山支祁肯就鎖摩牙吮血
侈肆披猖安得囚之崑崙鹽腦扼吭寢皮食肉永靖八
荒自此雨暘以時歲豐穰君子有穀天降祥

龍骨車

人以足
踏灌田

臨崖支架競灌田兩人踏空立比肩四足登輪輪迴旋

如往而復機相牽密密雁齒排比聯纍纍珠貫一繩穿
似蛇尋穴上下翻掣水汨汨若湧泉斟酌多寡隨所便
人工妙處巧奪天北土溪漲倒狂瀾危崖峻削岸復寬
澗可立待誰瀦淵縱有機心難施旃再三歎息每縱觀
誰其創始殆疑仙

鹽井

鹽產於海或在池蜀中產鹽鹽更奇水伏於地數百尺
地下有無孰得知欲識地脉探水窟還憑巧匠鑿山骨
穴細如盃深莫測鑿來那復計歲月一旦水通如湧潮
長繩竹竿貫一條淡水滲漏偏能補

井身以竹貼裹恐淡水參入漏能

補肯使點滴得混淆黃牛挽繩如旋磨自地升天筒一
箇竹竿通透水滿掣上去其底水盡竭傾水成渠如灌畦鐵鍋煮鹽裕國
課水性不一辨重輕得鹽多寡分濁清罪罪如雪市中
鬻堅硬巨塊運邊氓細者名水花鹽味惡本地鬻巨者名鍋巴鹽運黔省榮邑邇
來商無力苦說井人多堙塞官稅不盈頻追呼令我對
井三歎息

火井

火井焰騰漢祚復巴蜀幸邀如天福南方丙位占離明
性雖炎上地中伏屈指興替千載餘遺制猶存增感觸
鑿井深深不見泉熱氣噴吐似飯熟竹竿引氣如引泉

支分派別竹續竹煮鹽無復費柴薪更比人間烟火速
無質亦無光得火如然燭以火引之遂不息之豬腯盛貯密不洩

有客贈遺攜箱籠陰火浮於水陽火附於木火能生土
土生火循環安能測化育鑽燧敲石真瑣碎數千百竈
相聯屬諸葛當年稱盛治通商富國共尸祝非徒火德
徵祥瑞調元贊化資蘊蓄方今天子正當陽炎威赫赫
耀南服

油井

伊昔秉燭油未作後來銀缸光閃鑠孰知大地蘊精液
融似石髓待穿鑿初意欲得水煮鹽無水得油悔鑄錯

良宵不堪置金閨其色渾濁味臭惡濃烟薰騰爭掩鼻
安得清賞伴花月獨有神奇堪寶貴風雨不滅更照灼
去歲海疆頻用兵海船高大肆侵掠飛檄調取來兩川
用備火攻敵驚愕水湍愈熾千炬紅灰飛一霎斷蓬索
天下無用有大用遠勝魚膏照六博自悔短檠棄牆角
於今白首成濩落蘭膏吐花空芬馥何似策勳將敵卻

韓娥篇

四川成都鹽運使新澤孫女處士成之女元末
寇亂叔母易以男衣冠爲賊掠去托名韓關保
十二年回家

錦江女兒如花豔女兒豪俠帶霜劍不信請看韓娥篇
英雄兒女一身占兒家生長本高門阿翁轉運沐皇恩
無端羣盜如蜂起兩川瀕洞風塵昏吁嗟弱齡椿萱失
深閨叔母憐慧質一旦骨肉痛分離玉貌含羞未敢出
開箱攜取男衣冠總角梳妝別樣看忍使明珠混魚目
獨恐樵採刈芳蘭牽衣泣別難延佇道旁觀者爲酸楚
漂萍泛梗各遁藏海角天涯知何處滿途戈甲馬如風
強裹良家入伍中冒稱男子韓關保指揮迫協負刀弓
殺人如草起腥穢峻嶺深溪那敢退月黑鎧紅萬帳聯
孤身宛轉豺狼隊誰氏妖嬌露花鈿誤落虎口泣呼天

冰姿噴血死堪惜花貌委身辱可憐有緣幸遇王萬戶
拔出火坑得樂土轉贈朋好羅軍官從此奉事尊如父
袴褶從戎箭在腰蹙眉肯將黛輕描溯迹旌旗淚偷洒
迴頭鄉里魂暗銷青年出走纔十二荏苒韶光二十四
屢經戰陳血染袍防身惟防意外事不向東風怨落梅
女蘿強附遺良媒釵裙竝坐光輝映雌雄免走費疑猜
良宵怕進芙蓉帳洞房相避不相向此身恨不變男兒
此時意氣何由壯忽報官家又徵兵策馬隨軍到錦城
兒家門巷何從認花木斫伐臺榭傾徧向塵閒詢父老
柴門斜啓滿荒草扶藜衰媼步蹢躅紅顏非昔首已皓

轉問客來自何方聞聲欲語悲斷腸老眼模糊疑武弁
那識兒身是女郎含情歷訴更嗚咽當日牽衣泣離別
萬馬叢中烈火飛鍊得貞心堅似鐵一從別後幾經春
關河迢遞隔烟塵多少芳容埋黃土未隨新鬼化青燐
聞說生還自遠郡頻呼小名頰微暈失喜花朵光照人
蓮出污泥仔細問手捫刀痕淚潸潸趙璧無瑕竟得還
腰間窮袴針縫密臂上守宮血點斑火伴周防晝兼夜
今日歡欣當時怕明妃出塞終不歸文姬入關身再嫁
脫卻鐵衣換羅裳窗前對鏡貼花黃完節共推奇女子
鄰里爭看相扶將洪武天子明堂坐大開金門受朝賀

驚聞奇迹世間稀
賞賜崇隆萬口播
吁嗟乎灼灼夭桃
女兒身萬人海中
不能侵雖非代父
邊關去一曲木蘭
千載心

都尉冢

西充女子代父從征
以功授都尉數載棄官歸
嫂嘲其腰軀肥大女會親鄰
剖腹以示無他葬
鳳了山翁仲猶存人呼都尉
娘娘冢未詳時代
姓氏

都尉古冢草蕭蕭
林深月黑風怒號
鬼火青紅耀涼宵
火光閃爍隱嬈嬌
似聞鐵馬聲囂囂
千載貞魂恨未消

父老太息述前朝有女代父馳征鏖萬里關河去迢迢
旌旗獵獵風飄飄女兒身健馬騰驍男子裝束弓在腰
破敵擒寇稱雄驚勅封大官加錦貂屈指數年歲月拋
困頓風塵芳顏彫年過未肯賦桃夭深更風雨歎無聊
眷念故鄉心忉忉欲完骨肉歸蓬茅不著鐵衣拖紅綃
重施丹粉插翠翹嫂氏旁看螺黛描笑指頤腹騰譏嘲
大開華筵備香醪左右親鄰徧相邀再拜席前頰紅潮
身在行閒隨征旄無人識破敢橫挑冰心耿耿日月昭
對眾解衣胸插刀熱血噴溢氣衝霄四座驚歎蹙眉梢
如斯節烈勁不撓辛勤代父著勳勞惜未跨鳳偕吹簫

橫被惡言似焚燒一朝霧散天沈寥仰視秋天明月高
應有過客陳芳椒墳頭壠塊酒杯澆

文鸞

四川李研齋太史之婢已嫁生女研齋隨明藩
舉兵被執夫人在家謀以死殉文鸞請夫人與
公子逃畱李氏一脈而已代夫人女代公子官
不能辨遂代戍邊

覆巢無完卵燎原禍太遠忠義萃一門俄頃剪草滅艾
夫報國甘就烹夫人拚死女中英更有文鸞奇女子吐
詞慷慨明且清闔門盡節不受挫可憐李氏無一箇彩

鳳談雛請速飛罪重如山妾當坐後門夫人出前門捕
者來引頸就縲綫兵卒不疑猜婢作夫人非兒戲公堂
侃侃明大義滿庭官吏驚咋舌何忍笞辱但垂淚囚者
坦懷奔者忙閒關義士相扶將謂羅吉甫風吹海立蛟龍舞
扁舟一葉出汪洋錢塘骨肉重聚首夫得見妻子隨母
痛說桃肯代李僵太史珠淚傾盈斗翻城背主有多人
不惜名節但愛身誰如紀信能誑漢惟愁趙璧輕投秦
消息難達書一紙入網安知生與死婉婉弱女智勇兼
人臣捐軀應爾爾滄桑家世痛流離皓齒紅顏又一時
謂娶鍾山秀才南國花月英雄淚北塞風沙兒女悲當年精衛

志填海百折九死終不悔感激忠烈摧心肝仗義還憑
山幘在吁嗟乎男報主婦抗節婢子酬恩更奇絕蜀國
哀絃不忍聽蜀山杜宇空啼血山可移江可竭千載芳
名應不滅

西園第一會題桃李園夜宴圖

天地爲廬我爲客春光欲去留無策白日匆匆易黃昏
乘閒爲樂中情迫誰寫翩翩李青蓮桃李園中集羣賢
良宵興發相嬉遊天倫樂事開芳筵銀燭高烧花四面
紅兒雪兒侍筆硯看他豪氣籠千人欲爭大塊文章綢
舉杯邀月月飛來嫦娥更勸酒一杯芳樹如幄圍綿繡

高座搖筆走風雷詩仙酒仙古未有共驚文光燭牛斗
詩成得意解者誰桃李無言似點首不用紫絲步障誇
豪奢不用題詩牆上籠碧紗但願年年春不老更願樹
樹盡開花明月窺人人未睡一首詩成一回醉詩成一
字一明珠紅雨白雪當空墜謫仙欲眠神飛揚夢與花
神相遊戲嗚呼此遊千古一樂事幸不虛生在天地

西園第二會題細雨騎驢入劔門圖

萬點蜀山青簇簇雲棧縈紆跨山谷屹然劔閣插霄漢
行客至此步瑟縮何人騎驢得得來千山萬水圖一幅
是時天陰雨濛濛雲氣幾縷出山腹四顧杳冥哀猿啼

兩崖迴合多喬木一僮持傘身傴僂一叟披蓑頭半禿
嗟乎蜀道難於上青天先生何事入西川不得高車駟
馬比相如不得持節通夷似張騫雨聲蕭蕭風發發看
他驢背聳吟肩前途茅店懸酒旆歡然似笑舉竹鞭但
見衣袂苦沾濡不知新詩得幾篇憶昔我來自齊魯隴
樹秦雲可歷數山狂谷狠雲吐吞暑氣炎蒸雜風雨雙
劍倚天關關門刻劃疑經巨靈斧天梯石棧捫井上胸
中壯氣快一吐安得奇材似放翁願爲執鞭不辭苦

西園第三會題乘風破浪圖

雲烟蒼茫觀者怖波浪掀翻天吳怒誰移江海入壁流

妙手淋漓拂絹素咫尺萬里空復空草木摧偃吼長風
中流一葉疾於鳥揚帆飛渡蛟龍宮宗慤少年氣貫斗
胸吞雲夢者人九陸路欲射虎爛斑水際欲試斬蛟手
鷁首衝浪高復低巨魚噴沫與山齊風伯助勢日月昏
篙師縮手舟子啼丈夫意氣勇而果那慮陽侯怒掀簸
將軍樓船立奇勳順流一戰翦么麼張騫乘槎至層霄
石載支機文錦裏人生志在濟巨川犯險出險爭先鞭
渺視四海若蹄涔蛟鱓奔避孰敢前畫手亦復氣豪邁
萬斛巨舟渺一芥我苦跼踖在風塵觀此逸興真大快
憶昔雅人高杏江圍鑪題畫才無雙猶記佳句等片鱗

百斛龍紋筆可扛

高杏江與同人雅集題此圖僅記中流一葉句

廉訪劉燕亭先生三巴舊古志刻成敬題長句

雒水書出古梁州

洛出書或云洛應是雒禹生于蜀雒水在蜀故觀書衍疇雒字通用

大禹衍疇神與謀鑄鼎刻石羅萬象蜀惜無碑比岫嶠

李冰作堰剡苔蘚字抗相斯筆非輓文翁石室刻劃精

金馬碧雞詞洪演

舊有碑文世闕兵燹風雨蝕剝落漫滅存

青辭金石古文著升菴考究碑目力窮探

宋王象之按著蜀碑目

圖索駿想髣髴屠門大嚼心空貪海岱高門毓英傑

乾隆

開文清公蒙賜詩海岱高門第

劍閣叱馭來秉臬平生嗜古無匹儔

搜剔球琳補殘缺吾鄉趙氏金石錄

趙明誠爲淄州牧婦李易安歷城人

共輯金二千餘種人歎絕所惜篆隸失形模未見畫沙

力屈鐵

阮芸臺楊對山皆于鐘鼎尊彝摹其篆文各體俱備金石錄但存計跋與集古錄同茲先生

所輯皆縮本繪圖照本交篆隸摹出

先生踵起志願洪力追大雅闢蠶叢

恒侯刁斗諸葛鼓下逮顏柳米南宮

川中諸公筆迹最多古冢荒

祠闕光怪擅椎摹揭披棘荆屈玉紐金認雲篆翠羽硃

班拾斷銅考偽證訛參史傳上下千古非雕蟲山左右

蹟未湮沒秋帆芸臺辨毫髮

兩公輯山東金石二十卷

何幸江漢得

鉅公搜揚幽秘昭日月物聚所好堆几案螭紐龍文驚

突兀吾語世人莫須驚九鼎一鑿試小烹

先生蒐羅金石文三十餘

年輯成金石苑茲來蜀刊三

巴魯古志特備金石苑之一上窮蒼雅下吾衍斷蛟怒

猊恣品評竊怪先生何不廉蒐討海內竭精英裝載舟
車虹貫月藏之篋笥敵玳瓊將來傳播貢石渠太學觀
摩徧諸生不然上帝下取遣六丁雷霆鬼神怒鬥爭先
生大笑酒杯傾

唐善業泥佛像爲廉訪劉燕亭先生題

公自記云道光己亥夏余滯跡長安偕同人出
遊城南慈恩寺於雁塔下拾得唐泥造像或全
或缺大小凡八枚其全者文曰大唐善業泥壓
得真如妙色身三行十二字陽文遒勁不亞敬
客書甌塔銘一面一佛坐蓮臺左右二侍者立

蔭以兩娑羅樹下二獸作對伏狀其殘者文同
而造象各異或作三層上層列佛三軀又左右二佛
皆坐蓮臺中層佛三軀下層已缺佛前各執一
蓮花又一上層缺中一佛坐左右二佛持蓮花
寶蓋下層亦缺

黃土搏人盈萬千倏起倏滅如雲烟履土成形形歸土
泥牛入海何時還丈六佛身妙色相金剛不壞億萬年
誰歟造像壓泥成畱此善業證諸天有唐天子思報母
慈恩古刹勝蹟傳雁塔矗矗凌霄漢千佛名經貞珉鐫
幾代兵燹厯浩劫宮殿化塵啼杜鵑銅仙傾倒淚流鉛

石馬剝落秋風酸碑碣字缺蛟鼉斷鐘鼓聲沉龍象殘
有形卽壞色是空恆河沙散誰能搏我東大雅癖嗜古
來此搜剔剝苔錢太息斯地選佛場如來寂滅歸涅槃
一語未吐驚撥視妙相莊嚴泥非磚年湖有唐字無恙
其七半缺其一全娑羅樹下默趺坐猛獸馴伏道力堅
文字不殊像各異層層分列慈容端細垂瓔珞懸寶蓋
一笑拈花現青蓮無心拾得還猜疑傳觀賓客驚欲顛
如何泥質閱千禩風吹未破雨不穿是佛非泥超迹相
天神呵護孰敢干虛空粉碎法無盡眞如不動離言詮
从委荒草人莫覩出世偶遇緣非慳公心卽佛佛相證

以印印泥如是觀惜未記年資考訂但見鐵畫龍蜿蜒
願揭萬本施萬眾掃淨心垢禮拜虔從此焚卻木居士
不容更談野狐禪大地皆泥泥成佛惟善知識妙義宜
不信請看善業泥永永寶藏妙相圓

綠雲篇

辛氏母夢青衣女跨鳳至庭及生有文在手曰
鳳因名鳳遷字綠雲年十五爲德清蔡蕤僊選
室綠雲能詩善琴度曲圍棋刻石刺繡諸藝無
不通曉明眸皓齒意度溫婉與蕤僊甚相得蕤
僊就館威遠姬在成都以產難卒相從僅一年

也蕤僊不勝哀悼屬余作是篇志痛

仙娥游戲到人間青鸞飛到復飛還有客微吟洛神賦
何時再出蓬萊山蘭胎初孕曾占夢雲裏翩然下彩鳳
掌上有文字分明佳名肇錫已殊眾韶年十五度芳春
豔質靈心迴絕倫繡畫針摹宋北苑簪花格學衛夫人
儂家本在渝城住門外辛夷花滿樹深處幽閨嬌避人
一株芍藥紅欄護遲遲旭日上窗初釵墮烏雲對鏡梳
花壓翠鬟妝粉淺橫波一顧畫難如小院微風撲蛺蝶
淡黃衫子搖輕箑逢人斜睇羞舉頭脣破含桃開笑靨
春社年年士女盈粉黛如雲羅綺輕尋芳才子垂青眼

鳳願求凰與目成富兒豪貴心偏惱白壁黃金原非寶
惜花御史斷腸人暗裏朱絲牽月老良辰送上七香車
小住錦城便是家幸遇知音吟柳絮似曾相識認桃花
追歡尋樂無不有度曲彈琴兼賭酒人間無此好姻緣
枕畔盟心期白首無端行李迫倉皇怡貌低聲問玉郎
新愁纏我羅巾溼舊物遺君玉玦涼懷蘊明珠期已滿
柳絲難把離情綰感郎恩重妾身輕相憶時長相見短
斑駁上道惜忽忽門掩梨花細雨中翡翠薄衾中夜冷
鴛鴦雙枕半牀空那料辭家竟永訣入懷明月圓忽缺
瑞麟墮地璋無聲病眼盼郎淚成血垂危氣促細如絲

遺囑寄郎大婦知三生石畔緣重續萬里橋邊會有期
此語聽來酸肺腑玉容那忍埋黃土蘭房繡榻掛蠟蛸
孤家白楊戰風雨逝水流光歲又新遺鈎剩粉總傷神
含憤空中書咄咄攝魂畫裏喚真真屈指偕居剛一載
風催花落歸東海早知一別難再逢何苦分襟貽後悔
環珮聲遲恍惚來牽衣悲喜未疑猜淚傾一斛鮫珠斷
腸轉九迴膩語哀曉鐘催醒方知夢驚散彩雲堪一痛
情感如遭鬼伯妒魂歸似有仙風送年來書劍苦飄零
安得終朝對娉婷鐙殘孤館髮應白鬼泣荒墳草不青
將別叮嚀宛如昨吞聲嗚咽淚先落妾心貞比望夫石

郎品高如立雞鶴興懷觸緒不勝悲記得生平當告誰
簾前鸚鵡猶傳語檻外青山想畫眉寫就相思書一紙
焚向瑤池青鳥使爲言別後損腰肢此心不改如江水
眞容合把妙香薰千古鍾情孰似君紅顏種恨畱紅豆
綠萼成仙化綠雲

鏡香亭招客賞荷賦詩

去年五月池半枯荷葉憔悴客不愉今年五月雨頻降
池水洋溢長蒲菰紅妝臨鏡美且都箇箇捧盤承明珠
主人大笑拈白鬚招客來看傾城姝鏡香亭中香風送
停雲閣畔錦雲鋪是日天氣半陰晴翠竹森森周牆隅

芭蕉葉大遮曦影座客豪飲爭喧呼此閒小住銷永日
花爲四壁如蓬壺風吹綠葉忽紛披美人翔舞不用扶
雖無畫船來蕩槳烟波渺然卽江湖欲倩妙手繪爲圖
紅欄曲折石徑紆雜以紫薇兼碧梧危亭陡立中央孤
窗舊竝列如羅敷呼來明月代銀燭觥籌交錯相歡娛
客云丹青未免俗各製佳什毫爭濡四座傳觀互唱和
清韻響答如笙竽主人呼硯膽氣麤東塗西抹字模糊
蓮花無言但欲笑唐突西子形難摹吾醉不復知許事
且博眾客一胡盧

雪菴和尚

隱巴縣白龍山下松柏灘終夜梵誦乃周易也
或扁舟泛江讀楚詞讀一頁輒投于水投畢又
讀讀畢痛哭不言姓名蓋建文從亡之臣

一藩構亂稱至尊一僧倉皇出鬼門眾蛇從龍甘寂寞
乾坤一變風塵昏江海茫茫棲無地雪菴和尚飄然至
白龍山下結茅菴松篁交映落寒翠西山老佛土一邱
一盂麥飯何處求終夜梵誦爲超薦周易上九悔且尤
舜野死堯幽囚周公端坐垂冕旒呵壁問天天難喚抹
卻篡字書靖難高照接迹獨稱畔吁嗟天心未厭亂同
朝諸公多奇節睢陽怒齒侍中血天涯漂零剩孤僧氣

凜冰霜丹心熱讀盡一頁一頁沉楚詞卽是西方偶昨夜高皇見夢中臣罪當誅鑒此衷燕王羽翼皆英雄僧如病虎亦封公

歇神灘桓侯廟

相傳侯首順江流至此歇一宿後人爲立廟宋大觀閒掘土得三印佩鉤刁斗皆鐫侯名

桓侯桓侯何奇偉丈八蛇矛驚神鬼猛烈可匹壯繆侯下視曹瞞如蛇虺漢鼎傾欹不能扶怒目眈眈磔虬鬚千秋廟貌鎮巴蜀凜然英風生坐隅諸葛臥龍侯雄虎如公豈與噲等伍魂返關塞旌旗紅像著青黑面目古

東下長江濁流奔三峽倒流怒氣噴公含義憤水鳴咽
陸遜小子矢併吞印大如斗何時棄佩鉤或蒙君王賜
軍令分明嚴刁斗觀名如見平賊志丈夫不得死戰場
毒遭蜂蠆真堪恚遺物流傳何處藏夜看衝霄虹吐氣

虞雍公劍

公八世孫堪藏公遺器四瓦琴石磬蜀王硯其
一劍也長三尺握具五寸弱鐔橫二寸作饕餮
狀有款識曰千萬歲利可吹毛星月之下光采
豔發千年物也

蜀都寶劍光皎潔月下審視欺霜雪何人佩身驚魑魅

忠肅虞公仰前哲采石一戰眞英雄氣吞強敵日背裂
老將劉錡不敢前王權棄戈空卷舌公本文士思報國
手劒一揮寇摧折乘勝急欲鼓三軍追蹤直探虎狼穴
公屢請進兵不允一木竟將大厦支此劒錚錚豈凡鐵子孫寶
藏幾百年篋中電光時一掣懦夫戴頭驚卻步腥風猶
帶當時血嗟乎斬馬劒志空結欲滅外寇除內奸會之
鼠首快一決

蘇宅榆

眉州蘇氏舊宅老榆相傳老蘇手植

天上厯厯種白榆妙手偷來植牆隅一代文星歸天上

猶留古樹表老蘇宋社已墟宮殿換冬青幾株枯陵畔
元祐老屋何處存

漕南村有元祐老屋今存

粉榆舊社無枝幹獨留

餘蔭覆井里當日樹下曾課子眼看培植作棟梁無復
穿穴容螻蟻宦遊迢遞去家山回首巴蜀何時還荒榛
斷梗塞三徑飛錢散落墨池閒

池有

荒宅至今餘碑碣藤

纏蝸篆字半沒幾經兵火全天年葉堆如山驚突兀烟
濃遠接巫峽雲枝疏仍掛戟眉月諸葛柏蜀苑梅千載
久已化劫灰此樹猶爲人愛惜文采風流安在哉白晝
綠陰蔽日月夜雨老幹戰風雷嘯空時時作龍吟疑是
魂魄戀此復歸來騎龍跨鳳下九霄宮唱商應氣雄恢

雙桂行

新都升菴故宅雙桂猶存今修治爲勝蹟

君不見狀元郎宰相子風流翩翩世莫比胡爲出門行
萬里故宅久荒僅剩此當年移自月宮裏姮娥憐才相
顧喜白玉飾雕欄黃金綴丹蕊俾爾著作揚芳美詞比
相如文中壘一旦痛哭爭考妣瘴雨蠻烟走金齒荆棘
塞途傷吾趾傳粉簪花聊復爾叢桂生與死寄問少魴
鯉美人隔雲端封花無信使霜欺風摧不復理戎客憔悴
恰相似平生著述千萬紙百世薰香敢訾毀往來過
客均仰止欲薦桂醕采芳芷吁嗟乎當門鋤蘭事已矣

至今馨香流青史

題計珠渠傳後

名良治號惺齋居羅江之珠渠因以爲號

儒者讀書果何事拈毫弄墨等兒戲人生大節在本根
古今名教有樂地球渠先生內行敦數端卓卓人稱異
侍父痼疾心煩憂折肱良醫跋涉求歸路水漲河梁斷
滅頂身幾赴東流惟祈父生不懼死藥裹未肯付陽侯
孝子事母如事父嘗藥無靈竟割股密裹血痕人不知
深恥姓名聞縣府吁嗟乎華士躍躍矜文章醇儒責躬
在綱常文章悅人春花豔綱常維世青史光孝子事生

精誠積孝子事死天可格靈柩在堂魂魄安鄰里鼎沸
火光赤夫婦驚呼子女號黑風助虐情惶迫須臾祝融
斂炎威近舍火滅僅咫尺珠渠先生守箴瓢讀書餘暇
耕且樵孤身事親不出仕詩文不屑付開雕水不溺火
不焦自古誠孝干雲霄宇內讀書人千萬惟看孝子名
不凋

蕭吏

蕭吏不可爲蕭吏無後患子孫或負薪陶然樂貧賤郡
塢之金頃刻散大書特書留史傳

道旁碑

高

蜀 直

卷二十七言古

七

道旁碑緜苔滋孤冢草荒埋者誰碑高丈二蟠螭蟠虬
掌斷文半可識才埒稷契德伯夷徘徊弔古訪實蹟徧
問村人人不知吁嗟乎古今幾人副此辭爲想當年命
筆時

九月八日赴威遠三日回署重陽已過乃約廖扶

九張海雲兩山長及署中王遲士許鴻軒周寶

傳小飲於龍祠作展重陽

祠在城內山上

我倦風塵牛馬走道途無緣開笑口慚負重陽駒隙過
未攜綠蟻傾數斗今朝興發狂不羈怱怱折柬招良友
案牘如山撥不開纔得抽身日及酉古寺踞山恰在城

杯盤草草展重九軒窗豁遠見南山一堆蒼烟撲座右
萬瓦鱗鱗浮青靄樓閣參差絕塵垢今年菊花太闕珊
菊受傷丹楓烏柏亦何有清明寒食次第催回看流光
時未久人生何事苦束縛佳節已逝可挽否自古登高
幾賢豪詩賦流傳敵瓊玖就中歡樂兼悲慨醉把茱萸
頻搔首故園兄弟渺天涯雁行嘹唳失先後且與諸公
拈素毫若箇鯨鏗兼獅吼微雨飄灑送清風今日銜杯
真不負

與諸友作詩會共咏雪山

我居山東近海岱冬日雪飛瓊瑤碎我來西川不見雪

炎燠滕六職疑廢誰知竒觀天下無萬里雪山亘絕塞
禹跡不會到遐荒天限東西迷向背層冰突起凌九霄
風霰積累自何代燭龍不照赤虬逃日輪行空到此礙
六月炎天凍不銷縱披重裘寒不耐晴晝皎潔光射眸
深夜晶瑩明不晦一白混天界華夷荆關妙手不能綸
白銀宮闕起重重百萬玉龍蟠大塊天公作戲太顛狂
穹窿欲塞乾坤內 聖朝拓疆二萬里包括西域圖經
載士卒往返頻顧瞻結聚今昔每殊態却嫌諸峯狀多
俗盡失白地抹青黛九頂玉壘屬兒孫峩嵒積雪亦後
輩雪汁融化灌岷江餘波猶得萬頃溉一泓分流入黃

河水車鐵馬橫奔潰四顧天表仍嵯峨絲毫未減鼇難
戴金天肅殺得氣全作鎮西戎掃腥穢幾輩圖爐賦尖
又未極大觀馳域外瑤圃閬苑自人間祝融赫赫斂旌
旆我自北土來炎方濡染大筆寫雄概

錢滿腹

明季流寇破縣城殺縣令剖腹
實以錢惡其貪也戲爲作此

耻言阿堵非碌碌何爲以身障錢籠敲骨取髓民力竭
有似狼虎噉人肉昔聞菜蕪饑生塵渴飲廉泉亦滿腹
但聚金錢一室歡那知婦子一路哭蟻賊突然破縣城
令戀腰纏苦難行別有肺腸人不測未知谿壑盈未盈

前日殺人實草豆

賊殺人以草豆實腹喂馬

今看令肥百姓瘦平生

愛錢實以錢君如有知應樂受懷寶何能賄陰司渾身
祇覺聞銅臭吁嗟咫尺上帝臨鄙塢之藏亦何深八百
斛椒食不盡恨不剖腹填黃金

竹實謠

鳳非竹實不食竹之結實者最少偶結則竹林
皆枯實亦細碎無異味或云有一種結實甚大
味清甘此鳳之所食也然
無見之者作此爲竹解嘲

森森竹立依清漣萬葉千枝綠雲團何時結實飼鳳鸞
鳳鳥苦飢處深山雨雪忍凍修羽翰五色九苞誰復觀
鷄鶩爭食與方酣飛鷺惟覺腐鼠甘迴顧竹林幽且閒

綠玉蕭疎積風烟翻然高舉翔九天徘徊下顧棲息難
來儀盛世尤簡編集梧集竹非謀餐凡鳥肉重難高騫
蓄意凌雲或墜淵瀟湘之竹痕斑斑終古含翠仙妃憐
鳳未果腹飲清泉歸昌聲祝千萬年